

萬 有 文 庫

第 二 集 七 百 種

王 雲 五 主 編

宋 朝 事 實

( 中 )

李 攸 撰

商 務 印 書 館 發 行



宋 朝 事 實

(中)

李 攸 撰

國 學 基 本 叢 書

# 宋朝事實卷七

道釋

建隆初太祖遣使詣真源祠老子于京城修建隆觀在閭闔門外周世宗建曰太清觀帝命重修賜今名自是齋修率就是觀自五代以來道流庸雜乾德五年右街道錄何自守坐事流配乃詔萊州道士劉若拙爲左街道錄

〔案〕左街道錄原本闕街字今從李燾長編增入

俾之肅正道流開寶五年閏二月詔曰冲妙之門清淨爲本逮于

末俗頗玷真風或竊服冠裳寓家宮觀所宜懲革以副欽崇兩京諸州士庶稱奇詭者一切禁斷其道流先有家屬同止者速遣出外自今如願入道者須本師與本觀知事同詣長吏陳牒請給公驗方許披度十月又令若拙與功德使集京師道士試驗其學業至而不修飭者皆斥之若拙蜀人自號華蓋先生善服氣養生九十餘歲不衰步履輕捷每水旱必召于禁中致禱其法精至上甚重之大中祥符元年增宮名曰玉清昭應凡役工日三四萬發京東西河北淮南州軍禁軍調諸州工匠每季代之士卒歲一代並優其口糧資值選四廂都指揮使忠佐二員董役

〔案〕宋初有軍頭司引見司端拱元年並冠稱御前忠佐詳見文獻通攷此云忠佐從省文

立賞格以勸其所



用木石。則有秦隴岐同之松。嵐州汾陰之柏。潭衡道永鼎吉之杉。松桐楮。溫台衢婺之豫章。明越之松杉。其石則淄鄭之青石。衛州之碧石。萊州之白石。絳州之斑石。吳越之奇石。洛水之玉石。其采色則宜聖庫之銀硃。桂州之丹砂。河南之赭土。衢州之朱土。梓州之石青石綠。磁相之黛。秦階之雌黃。廣州之藤黃。孟澤之槐花。虢州之鉛丹。信州之黃土。河南之胡粉。衛州之白堊。鄆州之螺粉。兗澤之墨。宣歙之漆。賈谷之望石。萊蕪興之鐵。其木石皆遣所在官部押兵民入山谷伐取。挽輜車泛舟航以至。餘皆分布部綱輸送。又于京師置務。化銅爲鉛。治金箔。鍛鐵以給用。凡宮之東西三百一十步。南北四百三十步。地多黑土。疏惡。于京東取良土易之。自三尺至一丈。有六等。上以負擔之勞。令自新城濠。由廣濟濠。入舊城濠。抵宮門。〔案〕李燾長編。上以道里稍遠。令丁謂等議。謂等請用車載土。上曰。挽舟止役十人。而土可速致。令三司以空船給昭應宮運土。浚治渠道。自新城北濠入。與此所載詳略互異。兵匠供茶酒飲食。綱卒皆給鞋錢。

衣履口糧。民以材木鬻于官者。蠲其算。或有獻良木者。優賜其值。車駕時來省視。必有賜賚。遇節序日。別賜燕會。及宮成。令長吏于采木石處。建道場以謝。五年。聖祖司命天尊降臨。改奉尊像于玉皇殿。東建司命殿。爲治事之所。十一月。詔名玉皇殿曰太初。聖祖殿曰明慶。天書閣曰寶符。凡宮殿門名。無慮五十餘所。皆御製賜名。親書填金。有司具黃麾仗。道門威儀。奉迎至宮奉安。東西山院。在集靈凝命之旁。皆累石爲山。引流水爲池。東有昆玉亭。澄虛閣。昭德殿。西有瑤峯亭。涵暉閣。昭信殿。〔原註〕山院常屬鐘中設茵褥。屏風。棊枰。琴阮之屬。北門

丙二宴殿曰迎禧迎祥後二殿曰崇慶崇福太初殿楚石爲丹墀龍墀前置日月樓畫太陽太陰像及環殿圍八十一太一東西廊圖五百靈官前置石壇鐘樓經樓

〔原註〕上聞江西有鐘洪大遣使取之既而不堪用令李溥就杭州別鑄重三萬斤

四隅置樓

闕其外累甃爲牆引金水爲甃渠環宮垣又分爲二石渠貫宮中六年四月上望拜奉迎丙午奉安肆赦闕下國家重熙鼎盛席慶善之鴻基百祿惟新承昊穹之蕃錫爰自綿區底定寶籙荐臻叶千歲之昌辰舉一王之茂典肇營恭館式耀丕圖偉嘉會以元亨荷太靈之昭格昔者九龍垂馭啓道德之仙源五老告期顯唐虞之瑞命天人交應古今同符昨以鍊楚越之良金法紫清之妙像肅陳仗衛迎至國都榮觀焜耀懽聲沸嘽上真高聖凝三氣之殊姿英祖神宗儼重瞳之粹質屬朝修之禮畢罄恪謹之誠深動色相趨降祥允集宅靈祕宇永申崇奉之宜賜福羣倫宜霈覃延之澤可大赦天下云云於戲昭事上帝惟懷永圖克己彌恭務守盈成之業保民在念庶躋仁壽之鄉更資同德之臣叶贊承平之治建安軍升爲眞州鎔範之地建爲儀眞觀玉清昭應宮作于大中祥符元年至七年十一月宮成

〔案〕宋史紀事本末十一月乙酉玉清昭應宮成初

議營宮料工須十五年修宮使丁謂令以夜繼晝每繪一壁給七燭故七年而成凡二千六百一十楹制度宏麗屋宇稍不中程式雖金碧已具劉承珪必令毀而更造所載較此爲詳附錄備攷

大中祥符元年建玉清昭應宮太初紫微殿寶符閣上梁日上皆親臨護其日大合樂工人以文繪裏梁金飾木寓龍負之輅以昇伶官讀文其上設機木散擲金錢餅果修宮使以下及營繕掌事者賜以衣帶

金帛有差。從官咸賜衣服金犀帶。

大中祥符元年。真宗建玉清昭應宮。又奉四像。御大舟。上設幄殿。皆內侍主供具。夾岸設黃麾仗三千人。騎吹四百。別列舟十艘。載門旗弓矢。青衣弓矢。又。道衆幢節。經過州縣。道門聲讚。鼓吹振作。官吏出城十里。具道釋威儀音樂迎拜。所過禁屠宰。止刑。京師禁屠宰七日。止行刑二日。甲辰。聖像至上齋于長春殿。百官齋宿朝堂。乙巳。上袞服朝拜。羣臣朝服。陳玉幣。冊文。酌獻。具大駕鹵簿。自宮城東出景龍門。五使前導。上望拜奉迎。丙午。奉安。肆赦。

真宗建天慶觀。大中祥符二年十月。詔曰。朕欽崇至道。誕生元符。庶敦清淨之風。永洽淳熙之化。式營仙館。以介民禱。宜令諸路州府軍縣。開擇官地。建道觀。或改舊宮觀名。題而崇葺之。以奉三清玉皇。並以天慶爲額。五年。閏十月。詔增設聖祖殿。惟西京謂之天慶宮。天禧中。各賜金寶牌。

王捷者。汀州人。咸平初。賈販至南康軍。于逆旅遇道人。自言姓趙氏。是冬。再見于茅山。命捷市鉛汞鍊之。少頃。皆成金。捷卽隨至和州諸山。得其術。又授以小鑲神劍。密緘之。戒曰。非遇人主。慎勿輕言。捷詣闕求見。不得。乃謀以罪名自達。至信州。陽狂大呼。

〔案〕陽狂。錦繡萬花谷引此作伴狂。

遂坐配隸嶺南。未久。逃至京師。官司捕繫。閣

門祇候謝德權。知其有術。卽爲奏請。

〔案〕江少虞事實類苑。捷逃至京師。搗登聞鼓。自陳與此互異。

得釋。乃解軍籍。劉承珪聞其異。爲改名中。

正得對龍圖閣。具陳靈應。特授許州參軍。留止皇城廨舍。時出遊塵市。常有道人與之偶語。云卽向來授法司命真君也。其語祕不傳。承珪爲創新堂駐之。乃以景德四年五月十三日降于堂之紗幮中。戴冠佩劍。服皆青色。自是屢降。中正傳達其言。凡有瑞異。必先告之。東封畢。加號司命天尊。及司命降臨延恩殿。乃上聖祖之號。每舉大禮。及有營繕。中正必達靈命。以藥金銀來獻。後改皇城新堂爲元符觀。中正累官至左神武軍大將軍。康州團練使。後贈鎮南軍節度使。塑其像于景靈宮。

〔案〕事實類苑。捷卒。贈嶺南節度使。謂之燒金王先生。建祠元寧院西。與此互

異。

上爲製靈遇贊。紀其始終。九年十月。內出所進金命鑄爲寶牌。分給在京宮觀。及外路名山聖迹。并天

慶觀。〔原註〕寶牌長二寸許。廣寸餘。而文曰。玉清昭應宮。成天尊萬歲。其背文曰。永鎮福地。其周郭皆隱起龍蛇華葩之狀。藥銀命鑄大錢。大會道釋于天安殿。賜之。凡萬三千八十六人。其後著令。凡官吏之官罷任。

並詣觀朝拜聖祖。禁乘馬轎入門。及不得食葷茹厭。遇天慶節。許士庶焚香庭中。八年四月。上命禮儀院備錄聖祖降臨置節建觀事狀。咸命刻石觀中。

〔案〕錦繡萬花谷。引此書云。大中祥符五年十月。聖祖降于延恩殿。先是有汀州人王捷者。咸平初。買販于南康軍。逆旅遇道人。自言姓趙。是冬再

見于茅山。命捷市鉛汞。鍊之成金。捷卽隨至和州諸山。又授以小鏡神劍。曰。非遇人主。勿輕言。捷詣闕求見不得。乃謀以罪名自達。至信州。伴狂大呼。遂坐配隸嶺南。未久。逃至京師。閣門祇候謝德權。知其有術。卽爲奏請釋軍籍。劉承珪聞其異。爲改名中正。得對龍圖閣。具陳靈異。特授許州參軍。留止皇城舍。時出遊市。嘗有道人與之偶語。云卽向來授法司命真君也。承珪爲創新堂駐之。景德四年五月。降于堂之紗幮中。戴冠佩劍。服皆青色。凡有瑞異。必先告中正。傳達其言。既降延恩殿。前八日。上夢景德中所親神人。傳玉皇之命。是夕五



鼓殿廷先聞異香。少頃黃光自東南至。燈燭失光。俄見靈僊儀仗。皆有光明。天尊至。冠服一如元始天尊之像。旁有六人。秉圭僊衣。上再拜于塔下。俄有黃霧起。須臾霧散。天尊與六人皆坐。上升西塔。僊童捧湯飲一器。器類碧玉。湯甘白如乳。天尊曰。吾人皇中九人之一也。是汝趙之始祖。再降乃軒轅皇帝。凡世所知少典之子非也。母感赤電。夢天人。生于壽丘。後唐時七月一日下降。生趙氏之族。今已百年。皇帝善撫育蒼生。無忘前志。卽離坐乘雲而去。及曉。以語宰相等。仍召至殿上。觀降臨之所。先東封畢。加封司命天尊。及此降延恩殿。恭上九天司命保生天尊。號曰聖祖。上靈高道九天司命保生天尊大帝。聖祖名玄朗。詔中外毋斥犯。遂以聖祖降臨之地。建新宮。名曰景靈宮。琢玉石爲聖祖像。初聖祖述感電降生之地。改兗州曲阜縣爲僊源壽丘。建道宮。以景靈爲名。命宰相王曾紀述其事。云云。與下條誤合爲一條。且多闕略。不若此書原本爲詳明足據也。

聖祖以大中祥符五年十月戊午。降于禁中延恩殿。前八日辛亥。上夢景德中所覩神人。傳玉皇之命。卽命內侍于延恩殿。大設道場。是夕五鼓一籌。殿庭先聞異香。少頃黃光自東南至。燈燭失光。俄見靈僊儀仗。執香爐扇拂華盃之類。皆有光明。天尊至。冠服一如元始天尊之像。旁有六人。四人秉圭。僊衣。二人通天冠絳紗袍。〔案〕李燾長編云。又六人皆秉圭。四人僊衣。二人通天冠絳紗袍。與此小異。上再拜于塔下。俄有黃霧起。須臾霧散。天尊與六人皆就坐。

侍從在東塔。上升西塔。再拜。又欲拜六人。天尊令揖不拜。命設榻。召上坐。僊童奉湯飲一器。器類碧玉。湯甘白如乳。天尊曰。吾人皇中九人之一也。是汝趙之始祖。再降乃軒轅黃帝。凡世所知少典之子非也。母感赤電。夢天人。生于壽丘。後唐時七月一日下降。總治下方。主趙氏之族。今已百年。皇帝善撫育蒼生。無忘前志。卽離坐乘雲而去。及曉。以語宰相等。仍召至殿上。觀降臨之所。十月二十五日。大赦天下。門下衆

妙之宗。蘊道樞而斯祕。非常之應。稽天眷以有孚。事夔絕于前聞。理克彰于合契。洪惟偉兆。實煥祥經。朕猥以眇冲。嗣承基業。荷九清之眷命。遵二聖之詒謀。不敢怠遑。粗臻嘉靖。頃以上真告貺。祕檢垂文。祇膺元命之符。申錫無疆之祚。間歲之內。盛典交修。秩衆祀以咸禋。感靈心之允答。彌懷惕厲。愈務欽崇。而穹昊顧懷。不忘于涼德。神祇鑒燭。荐發于休祥。粵以冬初。警于宵寐。戒先期而誕告。約真馭以下臨。宿設靈壇。仰祈鴻應。果于穀旦。肅奉睟儀。僊霧鬱蔥。異香芬郁。衆真列侍。寶訓躬聞。示基緒長發之祥。見希夷交感之盛。久留扃禁。倏返虛無。惟瑞異之親逢。曠古今而罕記。載循寡昧。奚以奉承。蓋祖宗在天。永錫爾類。而雷雨作解。恩及于民用。均純嘏之休。普浹龐鴻之慶。可大赦天下。於戲。至神善應。既本于無方。王澤誕敷。俾周于有截。匪獨在予之慶。式均與物之春。內省匪躬。荷茲殊貺。彌增抑畏。罔敢遑寧。更賴文武蓋臣。中外列辟。共欽元誥。各勵乃誠。叶宣永圖。同底于道。閏十月癸巳。

〔案〕李燾長編載閏十月己巳。天尊號乙亥。上聖祖母懿號是月乙丑朔。則己巳係五日乙亥。十一日也。此云癸巳。乃二十九日。

又併二事爲一事與長編異。

恭上九天司命保生天尊號曰。聖祖上靈高道九天司命保生天尊大帝。又上

聖祖母號曰。元天大聖后。車駕詣宮。酌獻聖祖母玉册文。維天禧元年歲次丁巳。三月庚子朔六日乙巳。嗣皇帝臣德昌再拜稽首。上言曰。恭以大道無形。爲一氣之祖。至神毓粹。居二儀之先。洪惟靈懿。無方柔明。有赫總妙。本而貴始。啓眞緒以肇基。顧以冲人。嗣守鴻業。夙持勵翼。思致治平。乃者穹昊監觀。祕符申

錫祐綿長之祚。曷清淨之風。瑞命殊尤。景貺紛屬。繇是勒封嶽岱。展事汾睢。旣明察以交修。復祺祥而若至。僊馭告期於中禁。晬儀來自于太霄。法從儼其音容。諄誨受于清密。諭感祥于大電。聆毓聖于高丘。厚德孚先。濬源長發。猥紹貽謀之慶。敢忘克荷之艱。享是休嘉。永懷欽奉。仰惟祖德之盛。爰上不稱。而母儀之尊。未崇顯號。斯所以順稽鉅禮。式耀徽章。允罄精衷。肅伸昭報。謹奉玉冊玉寶。恭上徽號曰。聖祖母元天大聖后。恭惟誕膺茂典。丕赫殊徵。垂祐後昆。永錫繁祉。謹言。聖祖名。

〔原註〕上玄下期。

詔中外不得斥犯。遂改

玄武。玄冥。玄枵之類。並爲眞字。玄聖文宣王爲至聖。七年詔曰。恭以感電發祥。合符御極。鴻靈累洽。盛德無疆。猥以眇姿。獲承大統。躬聞寶訓。逖示遐源。間覽庶僚。每形奏牘。或傍稽于文史。必上詣于名稱。雖歸美之可嘉。誠瀆尊之是懼。自今內外文字。並不得指斥黃帝名字。祥符五年十二月。遂以聖祖降臨之地。建宮崇奉。命修玉清昭應宮使丁謂擇地。及令禮官攷制度以聞。司天少監王希元上言。謹按天文志。太微宮南有天廟星。乃帝王祖廟也。宜就大內之內地營建。于是得錫慶院吉壤。卽命丁謂與內侍鄧守恩等修建。初八年正月丁酉。聖祖述感電降生之地。卽以其年閏十月。改兗州曲阜縣爲僊源縣。壽丘建道觀奉聖祖。以景靈爲名。建道觀奉聖祖母。以太極爲名。九年四月。宮成。凡一千三百二十二區。觀北卽壽丘。東南有小丘。改名慶丘。以石增累壽丘。設天尊像。慶丘設壽星像。上命宰相王曾。紀述其事。爲書二十卷。賜名曰聖祖皇帝天源錄。藏于天下名山福地。

大中祥符八年正月丁酉始興太極觀工作。七月丙辰詔曰：朕恭延飄馭，逖悟璿源，載懷尊祖之心，用建列真之宇。顧惟宗姓，實兆靈僊，遂命樞密使王欽若，討閱道藏，得趙氏神僊事迹四十八件，宜令修宮使分畫廊廡，庶昭懿範。永耀遐宗。五月宮成。凡七百二十六區。正殿曰天興，琢玉石爲聖像，仍刻真宗聖容立侍。

國初有神降于整屋縣民張守真家，自言天之尊神，號黑殺大將軍，玉帝之輔，帝命乘龍降世，衛護宋朝。但非棲真之士，無以奉吾教。守真有異骨，吾故降之。每守真齋戒祈請，神必降之。則室中冷風肅然，聲如嬰兒，獨守真能曉之。具道其意，所言禍福皆驗。守真遂度爲道士，卽所居創北帝宮，神爲守真傳結壇之法。曰：結壇有九，上三壇則爲國家設之，其上曰順天興國壇，凡星位三千六百，爲普天大醮，旌旗鑑劍弓矢法物，羅列次序，開建門戶，具有儀範。其中曰延祚保生壇，凡星位二千四百，爲周天大醮，法物儀範，降上壇一等。

〔案〕上三壇中壇各載壇名星位醮名而下壇不載係原本脫略無別本可校姑仍其舊

倘非禱祀不及備此三壇亦當精潔辭章鮮異花果扣鼓

集神懇禱而告去地九尺，焚香以奏，亦可感應也。中三壇則爲臣僚設之，其上曰黃籙延壽壇，凡星位六百四十，其中曰黃籙臻慶壇，凡星位四百九十，其下曰黃籙去邪壇，凡星位三百六十，此三壇所用法物儀範各有差降。下三壇則爲士庶設之，其上曰續命壇，凡星位二百四十，其中曰集福壇，凡星位一百二十，其下曰卻災壇，凡星位八十一，所用儀範量有等差。此九壇之外，別有應物壇，或六十四位，或四十九



位。或二十四位。法物所須。各以差降。士民之類。可量力而爲之。如臣庶上爲帝王祈祐。當作祈穀福時壇。凡一千二百位。或爲父母師尊。禳災祈福。當爲醮設壇。隨宜增益也。守真拜而受之。自爾多有徵驗。不能備記。乾德中。太宗皇帝。方在晉邸。頗聞靈應。乃遣近侍齋信幣香燭。就宮致醮。使者齋戒。焚香告曰。晉王久欽靈異。敬備俸緡。增修殿宇。仍表乞敕賜宮名。真君曰。吾將來運值太平君。宋朝第二主。修上清太平宮。建千二百座堂殿。儼三界中星辰。自有時日。不可容易而言。但爲吾啓大王。言此宮觀。上天已定。增建年月也。今猶未可。使者歸以聞。太宗驚異而止。太祖皇帝素聞之。未甚信異。召小黃門長嘯于側。謂守真曰。神人之言。若此乎。守真曰。陛下倘謂臣妖言。乞賜案驗。戮臣于市。勿以斯言褻瀆上聖。須臾。真君降言曰。安得使小兒呼嘯。以鄙吾言。斯爲不可。汝但說與官家。言天上宮闕已成。玉鑰開。晉王有仁心。翌日。太祖升遐。太宗嗣位。尋召守真作延祚保生壇醮罷。真君降言于內臣王繼恩曰。吾有言。汝當爲吾奏之。曰。建隆元年。奉帝言。乘龍下降。衛人君。掃除妖孽。猶閒事。縱橫整頓。立乾坤。國祚已興。長安泰。兆民樂業。保天真。八方効貢。來稽首。萬靈震伏。自稱臣。親王祝壽。焚香禱。遞相虔潔。向君親。吾有捷疾。一百萬。諸位靈官。萬垓人。若行忠孝。吾加福。若行悖逆。必誅身。賞罰行之。既平等。天無紛穢。地無塵。愛民治國。勝前代。萬年基業。永長新。繼恩錄之以聞。太宗覽之。驚異。稽首謝曰。家國之幸。宗廟之慶。虔荷上聖。賜此格言。尋遣內供奉官王守節。起居舍人王龜從。就終南山下築宮。方卜地于終南鎮。真君忽降言于龜從曰。此地乃

修建上帝宮闕之地不可易也。于是乃定。凡二年宮成。宮中有通明殿。玉皇三十二天帝。大遊。小遊。五福。四太乙。紫微帝君。并二十八宿。七元殿。黑殺殿。并靈官童子。六丁神。歲星。辰星。又有天蓬。九曜。東斗。三官。玄武。十二元辰。西斗。天曹殿。南斗。閣靈官堂。龍堂。命常參官一人。主宮事。選道士焚修。軍士百人守衛。題曰。上清太平宮。一如真君豫言之制。命常參官一人監宮。擇道士焚修。每歲三元。及誕節。皇帝本命日。並遣中使致醮。祀神之夕。上望拜焉。歲或水旱。或國家將舉事。率致禱焉。初宮成。真君忽降言。謂王龜從等曰。汝奉詔修宮。勤則至矣。然何爲不開日月華門。不畫八小殿壁。堦墀甃甃。亦未嚴備。惟求速成。以冀恩寵。然上天亦不掩爾功。亦不赦汝罪。守節龜從頗切驚懼。然已奏訖。役不及增。惟稽首祈謝而去。至闕。皆獲增秩。賜白金千兩。旣而守節染疾而亡。龜從歿于兵刃。太平興國初。太宗皇帝親征太原。真君忽降言于守真曰。官家已臨汾晉。非久克復城池。汝當令監宮內臣等設醮。以謝勝捷于上帝。守真等曰。國家大事。乞俟捷音。真君曰。上天已定勝負也。踰旬而王師告捷。監宮等以聞。帝遣內臣盧文壽齋內庫香藥。御書詞章。詣宮陳醮以謝。是夕。真君降言曰。官家設此大醮。上帝與諸天皆喜。國祚延遠。過于有唐。六年。守真以乾明節詣闕朝賀。召見。因面奏曰。聖真下降。俯爲昌朝。乞降詔加號。以答靈贖。上允其奏。尋下詔曰。太平宮神受命上穹。降靈下土。蕊芬致薦。胙饗有徵。大庇斯民。屢垂丕貺。宜加美號。以答神休。其封神爲翊聖將軍。詔至宮。守真焚香以告。真君忽降言曰。汝當上問官家所言翊聖者。翊何聖。守真數日疑懼不

取答。復降言曰：汝但馳奏，官家不罪汝。守真遂具章以聞。太宗覽之，召近臣謂之曰：玉帝輔臣，所翊者上帝也。當以此意報守真，令啓白也。旣而內臣傳命到宮，守真詣殿焚香以告。真君曰：此意是也。七年，守真復詣闕朝賀。真君忽降言曰：吾有言，汝當聞于官家。曰：大道興，陰謀滅，諸天聖衆皆欣悅。宋朝社稷甚延長。太平景運初興發，君上端心顯明哲，愛民治國常須切。萬年基業永長新，金枝玉葉無休歇。守真得之以聞，詔賜紫衣，號崇元大師。至道初，忽降言謂守真曰：吾建隆之初，奉上帝命，下降衛護宋朝社稷。今基業已成，社稷方永，承平之世，將繼有明君。吾已有期，却歸上天。汝等不復聞吾言矣。倘國家祈禱，但嚴潔焚香，北面告吾，雖不降言，當授福衛護宗社。大中祥符七年，詔曰：誕敷寶命，仰荷于至神。昭報殊虔，增于懿號。蓋爲邦之大典，庇民之深旨也。而況翊宣元化，表式衆靈。司陰隲于含生，播明威于福地。當王基肇啓，固降治而已彰。洎文考纘承，復先期而斯應。繇是亟營珍館，備薦徽章。蒙介福于無垠，佐鴻圖于累盛。顧惟眇質，紹撫緜區。屬典禮之交修，實祺祥之咨委。緬懷幽贊，敢怠欽崇。是用益以丕稱，奉之茂則。式達至精之懇，庶申祇答之文。期克萃于寅恭，永保寧于品彙。爰頒成命，俯告宰司。深體予懷，共宣其事。翊聖將軍，宜加聖號。曰：翊聖保德真君。守真又嘗啓真君曰：道釋儒典，並垂于世。未審崇奉何者，卽得獲其福。真君曰：太上道德經，大無不包。小無不納。修身鍊行，治家治國。世人若悟其旨，歸達其妙用。造次于是，信奉而行。豈惟增福，諒無所不至矣。釋氏之四十二章經，制心治性，去貪遠禍，垂慈訓戒，證以善惡，亦一

貫于道矣。奉之求福。固亦無涯。至于周公孔子。皆列僊品。而五經六籍。治世之法。治民之術。盡在此矣。世雖諷讀。多不依從。若口誦而心隨。心隨而事應。仁義信行。禮智之道。常存于懷。豈惟正其人事。長生久視之道。亦何遠矣。守真又嘗啓告曰。華山陳搏近卒。時人謂之尸解。未審其人。修何功行。證僊階乎。真君曰。搏之鍊氣養神。頗得其要。然及物之功未至。但有所主掌耳。端拱中。知鳳翔府高凝祐。嘗詣宮致禮。卽去。真君忽降言于監宮李鑄曰。高凝祐。行虧忠信。死非久矣。秩滿還京。爲三司判官。數月而卒。自真君臨降。官吏民庶。不遠千里祈禱。乞聞誨言。大抵多隨其性習。加以訓勗。人臣依于忠。人子依于孝。清淳者示之格言。貪酷者警以要道。詞甚平易。頗叶音韻。開寶中。侍御史路沖。乞賜真語。真君曰。盡力事君。以爲忠臣。濁財勿顧。邪事莫聞。整雪刑獄。救療人民。動合王道。終爲吉人。積愆爲咎。必有沈淪。衆生本無形之性。配有形之軀。曠劫以來。不能自悟。自有無極世界。不夜之鄉。混合太虛。杳冥同理。又曰。六合乾坤內。衆生多不會造孽。向前行。如盲鷄江海。如將智慧觀。自越千里海。沖再拜錄而誦之。左補闕王龜從。焚香懇禱曰。如何修身。得獲遐壽。真君曰。勸汝修鍊。莫如精勤。精勤不怠。上聖皆聞。太平降世。用武興文。無文則不用文。則益君。食祿則不違王命。行吉善。但守清貧。清貧者響合天地。濁富者像火投冰。投冰者火緣漸滅。積惡者自貫其身。自貫者殃及七祖。地府下痛苦及親。吾懸千尺之索。提釣有緣之人。道之尊。德之貴。大道能生一切物。衆生頭像天。足像地。中心空然。合真理。鑿戶牖以爲室。房室之中。有一物。亦無影。亦無形。



杳杳冥冥人不識。若能識者得長生。陽在天陰在地。二氣同和誠有謂。空中造化乃自然。自然之中生萬類。天不高地不卑。大道混合虛無理。學道衆生審欲聞。此是修行崇妙門。丞相沈倫嘗連綿臥疾。遣使致告曰。如何修行得免茲患。真君曰。靈物不病。形軀自安。形軀有病。返照而看。倫驚喜曰。吾得之矣。後數日疾遂愈。王德淵因遊終南山。寓止其宮中。勤奉香火。好養生而性褊。多所恚怒。忽一日。真君降言。謂之曰。汝學道修真。先當調習其性。以順天和。忘諸有爲。勿耗心識。融怡凝湛。道乃可見。復見之日。莫管內。莫管外。來往真靈無罣礙。所居安樂是汝家。各自勤行莫相待。先達之人難滯礙。真空妙樂有天堂。與聖相同滅諸罪。德淵曰。上感真君降言教示。不曉前篇內。與聖相同滅諸罪。願垂誨諭。真君曰。汝若除煩入靜。鍊心修真。積累其功。數盈之後。泥丸百節之神靈通。而自同于聖。天堂妙藥無所不至。豈更有諸罪也。故言與聖相同滅諸罪。太平興國中。駕部員外郎李鑄。嘗知鳳翔府。備觀靈應。俄復奉詔監宮。凡十餘年。志頗嚴潔。真君前後降語。僅十餘篇。其有錄者數首。一曰。建隆之初。方稟希夷。上帝命吾。衆聖皆知。乘龍下降。列宿相隨。五岳受命。主張地祇。潛扶社稷。密佐明時。吾要李鑄。知吾降期。不得輕洩。免漏天機。又曰。與吾盡忠理國。與吾以道理民。與吾慈善理家。與吾不飲自醉。醒時理民。醉時理神。此語是延年益壽之法。吾勸府主記取。又曰。爲官求理在貞明。智慧俱通臨事清。觀天行道合陰德。食君爵祿常若驚。爲吾洗心復換骨。背凡人聖奔長生。天宮快樂勝凡世。不夜之鄉挂一名。又曰。府主累世爲人。降生中國。與吾清直。莫

行邪曲。與吾積善累功。與吾佐輔明主。與吾洗雪黎民。與吾挂心刑獄。上帝若知名。天官也。剋取捨住世。輸流之財。但修取有形之像。獲隨身之功。得無量之福。與吾不得因循。不奈時光迅速。靈官賞汝功勳。天曹與汝添福。若一一依吾聖言。必得延年益壽。又曰。年登七十餘。住世不久。居饒君壽百歲。問汝得幾秋。地府直須怕。冥司難請求。有功無驚懼。積罪必遭誅。子孫難替代。早覺莫癡愚。淳化中。西京留守中書令趙普。嘗遣使備禮致醮。虔祈願聞休咎。真君降言曰。趙普扶持社稷。甚有功勳。上天所知。賜汝福壽。以大妨小。幽府亦有冤對。當啓誦真經。告祈天地。首懺前非。吾亦與汝達于上帝。庶解茲咎。汝官職壽數。已有限矣。其使錄之而去。普跪讀感涕。因焚詞謝過。遣人詣宮設醮。殿中丞張卓。嘗乞聖言。真君曰。大道養汝性。陰陽生汝身。爲吾勤行道。爲吾勤修真。公廉當用意。憂恤在乎民。遇時佐明主。清濁上帝聞。濁富終不久。清貧爲天人。莫教人道富。從他人笑貧。自有真家福。清高不愧貧。又曰。形凡性不凡。爲國顯清廉。家積千餘口。有罪自家擔。真君又嘗戒宮吏等曰。每存忠信。齊其天。文武班行。自有賢。爲主萬年安基業。常憂黎庶恐饑寒。長行德行合其道。燒香虔祝告虛玄。但願國安君長久。齊心輔佐太平年。凡真君所降語。帝命宰相王欽若編次之。爲三卷。藏于祕閣。仍賜本宮。

真宗咸平間。知揚州魏羽。上雩祀五龍祈雨法。詔頒諸路。其法以甲乙日擇東地作壇。取土造青龍。土器之大小。龍之修短。餘方皆如之。凡旱。建壇取五行生成之數焉。長吏齋三日。詣龍所。汲流水。設香茗果。率

官屬日再至祝酹不用樂巫覡雨足送龍水中。

擇潭洞或湫澗林木深邃之所以庚辛壬癸日先齋戒以酒脯告社令築方壇三級高一尺闊一丈三尺壇外二十步界以白繩壇上植竹杖張畫龍其圖以縑素畫黑魚左顧環以天黿十星中爲白雲龍黑色其下畫水波有龜亦左顧吐黑氣如線和金銀朱丹飾龍形又設阜旛刳鵝頸取血致盤中楊枝灑水龍上羣官再至祝酹雨足取龍投水中。

神宗建中太一宮衣冠之制熙寧五年建中太一宮內侍主塑像乃請下禮院議中太一衣冠禮院乃具狀請如東西二宮之制太一盡服通天絳紗有言亳州大清宮有太一塑像上遣中使視之乃盡服王者衣冠遂詔如亳州之制。

延祥觀紹興十四年建以奉四聖真君初靖康末上自康邸北使將就馬小婢招兒見四金甲人各執弓箭以衛上指示衆皆云不見憲仁后聞之曰我事四聖香火甚謹必其陰助及陷北庭每夕夜深必四拜及曹助南歸后令奏上宜加崇奉以答景貺云觀今在西湖上極壯麗其像以沈香斲之修繕之費皆出慈寧宮有司不預。

太宗曰古者一夫耕三人食尙有受其餒者今殆二十人矣東南之俗連村跨邑去爲僧者蓋傭稼穡而避徭役耳泉州奏未剃僧尼繫籍者四千餘人其已剃者數萬人尤可驚駭。

〔案〕此條見江少虞事實類苑採錄補入。

太平興國中始置譯經院于太平興國寺延梵僧翻譯新經始以光祿卿湯悅

〔案〕李燾長編太平興國七年建譯經院詔天竺國僧天

息災等各譯一經以獻以光祿卿湯悅兵部員外郎張洎潤色之湯悅原本誤作陽悅今改正

兵部員外郎張公洎潤色之後趙文定楊文公晁文元李尙書維皆

爲譯經潤文官天禧中宰相丁晉公始爲使天聖三年又以宰相王冀公爲使自後元宰繼領之然降麻不入銜又以參政樞密爲潤文其事寢重每歲誕節必進新經前兩月二府皆集以觀翻譯謂之開堂前一月譯經使潤文官又集以進新經謂之閉堂慶歷三年呂許公罷相以司徒爲譯經潤文使明年致仕章郇公代之自後乃降麻入銜

國家兩京諸州僧尼共六萬七千四百三人歲度千人自後削平諸國其籍彌廣

祖宗憫五代之亂民墜塗炭常布恩旨錫福天下太平興國七年九月詔曰朕方隆教法用福邦家念天下之度人拘有司之制度俾申素願式表殊恩應內外繫籍童行長髮並特與剃度

景德三年詔曰老氏立言實宗于衆妙能仁垂教蓋誘夫羣迷用廣化樞式資善利兩京諸州道釋歲度十人者特放一人不取經業祥符二年正月以封禪行慶詔天下宮觀寺院內十人度一人不滿十人者亦度一人三年天慶節兩京諸路宮觀每十人度一人不及十人者亦如之天禧三年八月詔普度天下道士女冠僧尼凡度二十六萬二千九百四十八人天禧末天下僧三十九萬七千六百一十五人尼六

萬一千二百三十九人。

〔案〕錦繡萬花谷引此書云天禧三年普度僧道凡六十六萬二千四百九十人。與此數不符。又攷文昌雜錄元豐間祠部歲比天下僧尼道士凡二十四萬。然死者亦常萬人。據此書所載真宗天禧時僧尼已

至四十五萬八千八百餘人。道士更不在此數。况至神

宗元豐時耶。龐元英殆據當時案牘之文未足信也。

天聖三年判都省馬亮上言天下僧以數十萬計。間或爲盜。而

民頗患之。請除每歲合度人外。非時更不度人。仍自今無得收會犯刑及文身者。詔並從之。

禮部勘當。今欲將本部例冊內僧尼等師號。頒降諸路州軍等處。照會委所屬官司。許于數內選擇書填者。奉聖旨依下項。

僧師號

法乘法真法照慧滿慧空慧海真悟真懿真戒妙空文慧普明慈懿慈濟真教明普宣祕慧照禪鑒淨因淨慧淨嚴淨悟普證圓證證悟慈覺慧覺密印崇辨通照

尼師號

妙清妙明妙滿妙果了慧了因了行了緣了真真懿真行真淨真戒真範慈懿慈媮慈悟慈願慈滿慈範慈因慧秀淨信圓照妙因崇智真寂勝因靖智登寂妙智真果寶勝

道士師號

真觀沖真沖清沖隱道清道空道安道成虛希虛安虛遠虛妙虛辨虛一虛濟虛應沖寂元觀元正明一

明素靈一明微洞元淵宗冲素冲寂崇道演道明素靈寶虛寂保寧洞淵

女冠師號

真寂真靜真懿真妙守一守白守真安素安教安常希妙希密希真虛範棲雲棲月靈素靈懿冲秀  
冲和通妙澄妙淵智淵妙通微希無真淨宣淨宗微澄秀宣真冲懿凝真元素冲真靈寂





# 宋朝事實卷八

玉牒

宋有天下百餘年。所與分天工共民事者。皆取之疎遠側微。不私其親。故宗室之賢。未有以勳名聞者。神宗皇帝。實始慨然。欲出其英材。與天下共之。增立教養選舉之法。所以封植琢磨之者甚備。行之二十年。而文武之器。彬彬稍見焉。

上嘗語及宗室多求外居者。宰相韓琦曰。臣請許親盡無服者外居。然後因之試以外官。上曰。宗子素未諳民政。若補外官。但慮易致過失爾。琦曰。陛下若命宗室習律令。久之。何患其不能從政也。參知政事趙槩曰。人臣子弟。未必皆有過人之才。使之從政。尙能粗了局事。蓋積習使然。宗室固多美才。若擇而任之。庶幾漸知爲政之方也。上曰。五七年漸當以外官試之。

〔案〕此條但稱上語宰相云云。不指爲何代。攷宋史。韓琦于仁宗嘉祐三年六月拜同平章事。趙槩于嘉祐七年三月除參知

政事。是時琦與槩並爲宰執。此當爲仁宗嘉祐七年以後事也。

富弼議裁捐宗室授官。英宗問輔臣前代宗室樞密使富弼對曰。唐之名臣。多出宗室。樞密副使吳奎

曰。祖宗時。宗室皆近親。然初授止于殿直侍禁供奉官。不如今之過也。朝廷必爲無窮計。當有所裁損。上然之。

徽宗朝增神宗教養選舉法。尙書右僕射蔡京等言。伏攷宗室在祖宗朝。制祿蓋寡。至仁宗時始除南班官。自率府副率。凡五六遷。遂至正任。承平日久。皇支寢繁。神宗皇帝乃下詔書。別其親疎。異其等級。遂斷自祖宗。袒免親。罷補環衛之官。盡除班行名目。袒免以外。更不賜名授官。止許應舉。自熙寧至今。宗室人無官者。已一千五百餘人。宗女之未嫁者。亦千五百有奇。皆宣祖太祖之裔。或有貧困失所者。臣等伏攷神宗詔書。蓋爲袒免既已。賜名授官。若願應舉者。自當依進士法。其非袒免。既不賜名授官。故止令量試藝業。卽推恩數。非若應進士舉之難也。至于年長。累試不中。則又有特與推恩。量材錄用之制。則隨其材器。收錄盡矣。至于世數稍遠。及貧無依者。則又賜田存恤。有差。逮元祐紛更。廢量試之法。改依進士科舉之制。是以自熙寧至元符初。三十餘年。中科舉者才二十餘人。旣廢量試之法。亦未嘗有以年長推恩者。賜田之令。徒爲虛文。雖有量給錢米之法。未能周濟其乏。遂致宗室不能自給。臣等謹追攷神宗詔書。推原本旨。稽之往者。增以當今所可行者。謹條具如右。一非袒免親。乃祖宗六世孫。伏請將上件服屬宗室二十五以上者。今次許于禮部投狀。試經義。或律義一道。以文理稍通者爲合格。分爲兩等。候至來春。附進士榜推恩。內文藝優長者。臨時取旨。其不能試。或試不中者。並赴禮部書家狀。讀律。列作一項。奏名。

今來止爲前此未曾推廣補放量試推恩之令。致使宗室無官者遂衆。有此陳請。只作一時指揮。不爲永法。今後自依熙寧詔書。賜田並于兩京近輔沿流州軍。取應未賣官田物業。撥充每州府各置宗室官莊。專差文武官各一員。與逐州通判同行管幹。逐縣兼管。仍置指揮使二員。每歲量入爲出。宗女量給嫁資。仍立定則例。量支嫁娶喪葬之費。其逐州自今後有沒官田產物業。更不出賣。並撥入官莊。仍先于京西北路撥田一萬頃。一熙寧詔書。袒免以下許隨處置產業。其出官卽置田宅。一如外官之法。蓋以宗支寢廣。其疎屬理當聽其外居。勘會宗室舊來在宮有出入之限。有不許外交之禁。宮門有譏察之令。今疎屬外居。僅遍都下。出入無禁。交遊不節。往往冒犯法禁。伏請非袒免親以下兩世。欲分于西京南京近輔。或沿流便近居止。各隨州郡大小。創置屋宇。仍先自西京爲始。每處置敦宗院。差文臣一員。武臣一員。管幹參酌在京院法禁可施行者。頒下。應無父母兄弟。見任將軍副使以上官者。許令前去。若有父母兄弟而願去。或無而不願者。聽從便。依外官赴任立法。量給舟船接人。一乞依神宗詔書。不拘世數。應宗子宗女尤貧失所者。伏請委所在州郡報明。量加存恤。詔奏。一乞于兩京置外宗正司官。掌業所在宗室。擇宗室之賢者。管勾外宗正事。仍自朝廷于本州通判職官內。選差二人兼領承簿。以主其事。一乞隨所在諸宮置學。添教授。立法教養。量試宗室。依熙寧文武官試出官法。策試經義。中選者。許令出官。若再試不中者。止許在宮院。使食其祿。一神考釐正宗室袒免非袒免。各立奏補子孫之法。獨總麻親。舊用國蔭。自來未

有蔭孫以下明文。伏請依外官例得補蔭孫。一舊制宗室祖免親參選常許不拘名次。陳乞指名差遣。非祖免親初選依條添差外。更不拘名次。陳乞指名差遣一次。以後每到部與陞一年。名次陳乞。今後宗室非祖免以下親量試出官者。並各于員闕外添差。每大郡通屬縣不得過十人。中郡不得過七人。小郡不得過四人。候到任不簽書本職公事。如有本轄長貳或監司二人保奏。堪任釐務。方得供職。未釐務者。添支驛券供給。人從從之。

宗室賜名授官。孝字親王之子。授武衛將軍。其餘宗室不用此例。○祖宗總麻親賜名。○承字男賜名克字。○宗字男賜名仲字。○從字男賜名世字。○授官太子右內率府副率。○祖宗祖免親賜名。○克字男賜名叔字。○仲字男賜名士字。○世字男賜名令字。○授官右班殿直。○祖宗非祖免親不賜。

〔原註〕  
熙寧二

年以前。叔字男賜名之字。士字男賜名不字。令字男賜名子字。

奏薦〔原註〕熙寧二年前。授太子右內率府副率。

以上承字宗字磨勘至使相止。從字仲字世字至觀察

使止。叔字士字令字授副率者。至遙郡防禦使止。之字不字子字賜名授官者。至遙郡刺史止。

襲封。〔原註〕國朝舊制。諸王之後。用本宮最長一人封公。繼襲。熙寧二年十一月。敕祖宗之子。皆擇其後一人爲宗令。世世封公。補環衛之官。以奉祭祀。不以服屬。盡故殺其恩禮。〔案〕宋史。秦王廷美傳。熙寧二年。詔宣祖太祖太宗之後。擇一人封公。世襲。無補環

衛官之句。而神宗本紀。是年十一月甲戌。詔祖宗之後。世襲補外官。與此環衛之官亦異。存此備考。

祖宗之子並傳嫡襲封。

〔原註〕熙寧二年閏十一月五日。聖旨。祖宗之子。並令傳嫡襲封。〔案〕宋史。秦王廷美傳。熙寧三年。以太

常禮院言令祖宗之子傳嫡襲封神宗本紀亦作三年七月詳定宗室襲封制度此書作二年與宋史互異

漢安懿王諸子〔案〕熙寧十年十月詔漢王子以次襲封奉祀此條漢安懿王諸子句下有闕文並脫去小註

宗室轉官資級圖〔原註〕并料錢

節度使兼侍中〔案〕宋史宗室敘遷之制由節度使同中書門下平章事轉節度使兼侍中節度使同中書門下平章事即使相也原本使字上脫節度二字侍中字上脫兼字

今從宋史補正

○使相○左衛上將軍○右衛上將軍節度使○三級〔原註〕四百貫

○節度觀察留後〔案〕宋制節度觀察留後月俸三百貫觀察使

防禦使並二百貫此書誤以觀察留後爲留後觀察而于防禦使之上脫觀察使三字將觀察留後及觀察使二職混而爲一今從宋史改正

二級〔原註〕三百貫

○觀察使○防禦使○一級〔原註〕二百貫

團練使○遙郡防禦使○一級〔原註〕一百五十貫

○刺史○遙郡團練使○一級〔原註〕一百貫

○遙郡刺史〔案〕自此遙郡刺史以下至衛將軍

月俸若干貫各有不同攷宋史職官志皇親任諸衛大將軍領刺史八十千將軍領刺史六十千將軍三十千率府率二十千副率十五千蓋宗室俸祿之制與敘遷之制不同故諸衛大將軍本六十千兼領刺史則增爲八十千將軍本三十千兼領刺史則增爲六十千矣此書俱闕註

附識備攷 一級○左右衛大將軍○左右金吾衛大將軍○左右龍武軍大將軍○左右羽林軍大將軍

○左右神武軍大將軍○左右驍衛大將軍○左右武衛大將軍○左右屯田衛大將軍○左右領軍衛

大將軍○左右監門衛大將軍○左右千牛衛大將軍○一級○左右衛將軍○左右金吾衛將軍○左

右龍武衛將軍○左右羽林軍將軍○左右神武軍將軍○左右驍衛將軍○左右監門衛將軍○左右

千牛衛將軍○左右領軍衛將軍○一級○太子左右衛率府率○太子左右司禦率府率○太子左右

清道率府率。○太子左右監門率府副率。○太子左右內率府副率。○一級。〔原註〕十五貫。

宗室換官。〔案〕宋制有文臣換右職武臣換文資俱見宋史職官志至宗室換官之制則略而不書此足補其闕。

諸衛將軍。〔原註〕就文官者換太常丞就武官者換率府率。

率府率。〔原註〕就文官者換太子中允

就武官者換內殿崇班。率府副率。〔原註〕就文官者換大理評事就武官者換西頭供奉官。

左右班殿直。〔原註〕換試衛知縣。

三班奉職借職。〔原註〕無專條。

以上須袒免親

將軍以下方許換出外官其大將軍以上願換外官者並臨時取旨。

宗室轉官資級。太子右內率府副率。〔原註〕轉太子右監門率府率。

太子右監門率府率。〔原註〕轉右千牛衛將軍。

右千牛衛將軍。〔原註〕轉右監門衛大將軍。

門衛大將軍。〔案〕宋史職官志千牛衛將軍當轉右監門衛大將軍右監門衛大將軍轉遙郡刺史原本右千牛衛將軍下脫小註轉右監門衛大將軍并大字右監門衛大將軍十五字今從宋史增入。

右監門衛大將軍。〔原註〕轉遙郡

刺史。遙郡刺史。〔原註〕轉遙郡團練使繼諸王後見封國公特旨即轉正刺史。

遙郡團練使。〔原註〕轉遙郡防禦使繼諸王後見封國公及特旨即轉團練使。

刺史。〔案〕轉遙郡防禦使原本誤作團練使今從宋史職官志攷正。

史。〔原註〕轉團練使。

團練使。〔原註〕轉防禦使〔案〕宋制宗室敘遷之制團練使轉防禦使原本團練使下多遙郡防禦使五字今從宋史刪去。

防禦使。〔原註〕轉觀察使。

觀察使。〔原註〕轉節度觀察使。

察留後。〔原註〕轉節度使特旨轉左右衛上將軍。

左右衛上將軍節度使。〔原註〕轉節度使同中書門下平章事。

節度使同中書門下平章事。

〔原註〕轉節度使兼侍中。

宣祖五子

太祖皇帝。○太宗皇帝。○邕王光濟。○秦王廷美。〔原註〕本名光美。○夔王光贊。〔案〕光濟早亡。宋初追封邕王。徽宗時改封曹王。廷美。太宗初封齊王。進封秦王。太平興

國七年降涪縣公。九年追封涪王。真宗復秦王。徽宗改封魏王。光贊幼亡。宋初追封夔王。徽宗改封岐王。攷東都事略及宋史皆書其最後徽宗時封國。故光濟稱曹王。廷美稱魏王。光贊稱岐王。而此書則書太祖時封國為號。體例與各書不同。

太祖四子

楚王德秀。○燕王德昭。○舒王德林。○秦王德芳。〔原註〕太宗嘗謂宰相曰。德昭德芳。先帝之子。朕篤愛之。猶子也。不欲異其稱。呼當令有司與昭慶公主而下。依舊稱皇子。〔案〕東都事略德

秀早亡。徽宗追賜名封滕王。德昭初封武功郡王。太平興國四年追封魏王。英宗改封越王。徽宗改封吳王。德芳。太宗追封岐王。楚王。徽宗改封秦王。宋史並同。攷德秀未嘗封楚王。德昭未嘗封燕王。于德芳則又書其最後封國為號。與本書體例復不合。疑有訛誤。

太宗九子

楚王元佐。○真宗皇帝。〔案〕東都事略及宋史。太宗九子長漢王。次昭成太子。次真宗。今此書列真宗于昭成太子之前。與各書互異。○昭成太子元僖。○陳千元份。○安

王元傑。○密王元偓。○曹王元偁。○涇王元儼。○代國公元億。〔案〕宋史。元佐原名德崇。初封衛王。進封楚王。改今名。雍熙二年廢為庶人。真宗即位復楚王。追封齊王。

潞王。英宗封魏王。徽宗改封漢王。昭成太子初名德明。封廣平郡王。進封陳王。改名元佑。後改今名。進許王。追贈太子。諡恭孝。改諡昭成。元份初名德嚴。改名元俊。封冀王。又改今名。封越王。真宗改雍王。追封陳王。潤王。英宗改魯王。徽宗改封商王。元傑初名德保。後改今名。封益王。真宗封兗王。追封安王。邢王。英宗改封陳王。徽宗封越王。元偓初封徐國公。真宗封彭城郡王。進寧王。徐王。追封鄧王。密王。英宗封韓王。徽宗封鎮王。元偁初封安定郡王。進舒王。追封曹王。華王。英宗封蔡王。徽宗封楚王。元儼初封曹國公。真宗封廣陵郡王。進封榮



王尋降端王。改彭王。通王。涇王。仁宗封定王。荆王。追封燕王。英宗封吳王。徽宗改封周王。元億早亡。追賜名。封代國公。英宗封安定郡王。徽宗改封崇王。此書于太宗諸子。皆書其始沒時。追贈封國為號。而于元儼。不書鄧王。而書密王。于元儼。不書燕王。而書涇王。則又自亂其例矣。

### 仁宗四子

襄王昉。○豫王昕。○鄂王曦。○英宗皇帝。

〔案〕太宗諸子以後。應繼以真宗諸子。永樂大典原本。附玉牒于祖宗世次之後。自真宗及英宗以下。世次既闕。而諸子玉牒。亦復不詳。

### 公主

秦國長公主。嘗為子莊宅使世隆求正刺史。

〔案〕宋史秦國長公主。即太祖女昭慶公主。太宗改封秦國。真宗時。進長公主。下嫁王承衍。子世隆。為京副使。歷洛苑六宅二使。不言其為莊宅使。此足補

宋史真宗曰。正刺史。係朝廷公議。不可。魯國長公主。

〔案〕宋史魯國長公主。即太祖女延慶公主。至元符初。追封魯國。

為翰林醫官使趙自化。求

尚食使兼醫官院事。上謂王繼英曰。雍王元份。亦為自化求遙郡。朕以遙郡。非醫官所領。此固不可也。駙馬都尉石保吉。自求見上。言僕夫盜財。乞特加重罪。上曰。有司自有常法。豈肯以卿故亂天下法也。又請

于私第決罰。亦不許。

〔案〕此條見江少虞事實類苑。今採錄補入。

胡宿上仁宗。論竟國公主議行冊禮劄子。今月二十一日。草福康公主特進竟國公主制。竊聞議行冊

禮然于事體。頗有未便。祖宗以來。公主長公主。未有行此禮者。昔漢明帝封皇子。悉半諸國。明德馬皇后曰。諸子食數縣。不已儉乎。帝曰。我子豈敢與先帝子等也。唐貞觀中。太宗長樂公主。將出降。帝令有司資送。倍于永樂公主。魏徵曰。不可。引漢明帝之言爲對。且曰。天子姊妹稱長公主。加長字。是有所尊崇。或可情有淺深。無容禮相踰越。太宗然其言。入告長孫皇后。后遣使賜徵金帛。陛下卽位以來。累曾進封楚國。魏國。二大長公主。亦不曾行冊禮。今施于兗國公主。是與大長公主相踰越。兼以貴主之故。賢妃亦蒙殊典。有旨令進諭告。不行冊禮。是母子之間。一行一不行。禮意尤不相稱。書于史冊。後世將有譏議。必謂陛下偏于近情。虧聖德之美。臣願陛下采漢明之言。開文皇之聽。遵祖宗舊典。如國朝公主曾行此禮行之。粗且無嫌。如其不曾。則宜且罷。臣以陛下好忠諫。納至言。臣職在論思。不敢不言。

除皇女福康公主進封兗國公主制。

〔案〕宋史福康公主仁宗長女嘉祐二年進封兗國。

門下。天道之美。濟下而光明。王化之行。由中而

洽。被唐堯有釐降之典。召南載蕭雍之詩。範俗崇風。于是乎在。國家慶靈。憑厚德教。深長迪厥。眞源育茲懿主。儀我皇室。繫于舅門。待年及于有行。涓日申于誕告。皇女福康公主。閑和居德。秀映棲神。聰悟之姿。非由于外獎。徽柔之性。乃蹈于自然。朕懷先后之慈。篤外家之愛。將敦美化。是選密親。教著沁園。導人倫之婦順。恩加渭水。廣天下之孝思。是用詳按舊章。稽合嘉禮。爰築其館。載肅之車。卜以仲秋。祉茲元吉。向班初冊。嘗擇美名。未拓膏腴。尙闕湯沐。進開曲阜之國。衍食龜陰之田。儀服有光。號名增重。於戲。貴宜思

降富勿期驕。尙懷國史之言。緬念衿禕之戒。往服休寵。永綏壽昌。

韋驥代陳少卿賀福康公主進封竟國表。中宸有命。美化務先于族親。貴主進封。優恩不奪于典禮。風聲

遐被。中外交忻。臣誠歡誠喜。頓首頓首。恭惟

尊號

皇帝陛下。配天地之德。紹祖宗之基。守無逸于持盈。槩

至公于立極。御遠以近。齊邦以家。治宮等周官之規。訓女偕堯舜之法。罔愧前躅。克成令猷。公主分乾之

英。體巽之順。雖曰愛之欲其富。不以生而榮。

〔案〕愛之欲其富以下疑有脫誤。無別本可校。姑仍其舊。

豈湯沐不可一而充。印綬不可一而

足。蓋誨育之存節。故寵私之有階。龍光一宣。慈孝兩得。教其有素。下嫁豈忘其矩度。澤非不隆。四方孰謂

之偏黨。朝野歡浹。人神氣和。邁治古之休光。增太平之盛事。臣限以官守。不獲奔走闕庭。稱慶無任。瞻天

踴躍之至。

德寧公主將出降。上謂輔臣曰。公主第及房從之物。比福康公主皆減三之一。又對羣臣。數稱唐公主多

適名人。而近世士人。乃畏尙主。命擇士人。得尙書職方員外郎王克臣之子孝莊者。故駙馬都尉承衍曾

孫。而父子皆業進士。令至宰相第。試以詩。而并其所業一編以進。上召見清居殿。拜左衛將軍。駙馬都尉。

賜名師約。又命以毋廢學。後又出經籍。及紙筆墨賜之。

〔案〕德寧公主。英宗長女。進封徐國。宋史載王師約字君授。英宗命宰相諭旨。令師約持所爲文。至第。明日獻賦一編。卽坐中

賦。大人繼明詩。遂賜對選尙公主。面賜玉帶。及九經筆硯。勉之進學。與此書所載詳略不同。史亦不載其本名孝莊。賜名師約。據此可補宋史之闕。

宣祖女

陳國長公主

〔案〕宋史太祖有姊一人未筭而天建隆三年追封陳國長公主。又案太祖同母妹初適米福德建隆三年封燕國長公主。再適高懷德元符三年改封秦國宋史但爲秦國立傳而附陳國于傳末以其早天未及下降也。涑水紀聞太祖將北征京師喧言出軍之日當立點檢爲天子太祖懼密以告家人太祖姊面如鐵色方在廚引麪杖逐太祖擊之曰丈夫臨大事可否當自決胸懷乃來家問恐怖婦女何爲耶太祖默然而出或云卽魏國長公主攷魏國長公主太祖女卽昭慶公主非太祖姊也據史云太祖姊早夭則引麪杖逐太祖者當爲太祖妹秦國長公主可知涑水紀聞屬傳聞之誤而此書于宣祖女止載陳國長公主不載秦國長公主意陳國必秦國之誤蓋此書于公主早亡及未下嫁者俱削而不書如太祖六女申國成國永國三公主早亡不載止載秦國晉國許國三公主太宗七女滕國早亡邠國爲尼沒後始有封號故不載其體例與宋史互異。

太祖女

秦國大長公主○晉國大長公主○許國大長公主

太宗女

燕國長公主○曹國長公主○晉國大長公主○鄭國長公主○申國大長公主

〔案〕太宗女以下應繼以眞宗以下公主永樂大典原本

俱失載



# 宋朝事實卷九

## 官職

乾德四年詔御史臺吏部流內銓南曹刑部大理寺自少卿郎中員外郎知雜侍御史以下及丞簿司直評事等並以三周年爲滿須常在本司莅事者至日限滿卽與轉官

〔案〕此與下二條俱見江少虞事實類苑今採錄補入攷李燾長編乾德四年八月壬寅詔以

憲府繩奸天官選吏秋曹讞獄俱爲難才理宜優異故詔御史臺吏部刑部大理寺等官並莅事滿三歲者卽遷其秩此書刪去上數語于詔意未能明晰

詔京朝官將命出入及受代歸闕者宜令中書舍人郭贄膳部知雜事滕中正戶部郎中雷德驤同攷校勞績及銓量材器候有闕中書類能以授之先是常參官自一品以下皆謂之京官未常參官謂之未常參官近代以常參官爲朝官未常參官爲京官故有朝官之目

淳化五年十一月詔吏部選人赴調並須于京朝官內求一人爲職目用府縣諸司監印

太平興國之初朝臣班簿才二百人至咸平初四百人天聖元年乃踰千人

〔原註〕李淑疏

眞宗初卽位以工侍郎郭贄知天雄軍贄自陳戀闕下不肯去眞宗曰全魏重地委任于卿亦非輕也宜

去。贊退。召輔臣問之。輔臣對以近例。亦有已受命而復留者。曰。朕初嗣位。命贊知大藩而不行。則何以使人。卒遣之。羣臣皆畏服。〔案〕此與下一條據江少虞事實類苑補入。

諫官陳升之言。比來館閣選任益輕。非所以聚天下賢才。張弛成就之意。請約今在職者之數。著爲定員。有論薦者。中書籍其名。若有闕。即取其文學行義。傑然爲衆所推者。取旨召試。詔從之。

景祐四年三月。詔自今尙書省議事。應帶職官三司副使以上。並不赴。如集議大事。詔特赴者。即別設坐。初。明道中。殿中侍御史段少連言。國家每有大事。必集議于尙書省。而本省官自三司副使已帶職者。多移牒不赴。請凡託故不集者。以違制論。既而太常博士集賢校理兼宗正丞趙良規言。都省集官議諡。用段少連請。應本省官帶學士知制誥待制。臣謹按國朝故事。及令敕儀制。別有學士知制誥待制。三司副使。著位視品。即與前朝制度不同。固無在朝敍職。人省敍官之理。今若全不論職。假有中後行郎中兼學士。〔案〕中後行郎中兼學士。長編作員外郎兼學士。與此小異。在朝立丞郎以上。入省綴駕庫之次。知制誥待制入朝。與六行侍郎同行。入

省。即位郎官之下。又如員外郎任三司副使。郎中爲判官者。在三司爲參佐。入省卻位其上。所以舊來議事。除別詔三省悉集。則中書舍人。知制誥。與常侍給諫。至左右正言皆赴。若內朝官悉集。則學士待制。三司副使。皆赴。若更集他官。則諸司三品。武臣三品。各在本司長官之次。若止是集尙書省官。其帶職者。並



合不赴。按閣門儀制。大宴。學士坐殿上。與僕射同行。知制誥與尙書丞郎同行。若曲宴。則三司副使在。知制誥之後。重行異位。豈有親奉至尊于殿上。其禮如此。暫入都省。而卻降損著位。又按故事。尙書省官帶知制誥者。並申書奏班簿。卽是于尙書省。御史臺並不著籍。故有絕曹之語。又國朝以來。凡定學士舍人兩省以上著位。除先後入外。若有升降。皆是特奉朝旨。豈有在朝入省。迭爲高下。又郎中員外兼侍御史。及任裏行者。皆稱臺官。不赴都省集議。臣以謂本省官兼佐臺職。卽是與帶知制誥待制等事體無異。又按唐翰林學士。有不知制誥者。只是與今直館事體相類。若國朝學士知制誥待制。則顯有著位。與唐不同。其侍讀侍講龍圖閣樞密等學士。及三司副使。卽是國朝新制。唐朝三司。自是尙書之職。自後別置使額。而與今不同。請自今除集三省官議事。卽如舊外。若是本省議事。其學士知制誥待制三司副使。更不赴議。詔御史臺與太常禮院詳定。以聞禮院言。按唐李肇翰林志。凡學士無定員。皆兼它官。下自校書郎。至諸曹尙書。皆得爲之。旣入院。與班行絕跡。亦不繫常參類。守官三歲。則遷。知制誥五代職官志。翰林學士入院。並先後爲定。惟承旨一員。出自上意。不計官資先後。在學士之上。國朝儀制。令敕翰林學士侍讀侍講學士。龍圖閣學士。樞密直學士。龍圖閣直學士。並在丞郎之上。龍圖閣待制。及知制誥三司副使。在少卿監之上。自唐至國朝。翰林學士知制誥待制三司副使。與本官絕曹。不屬南省官之例。載詳會議之文。由來非一。或出朝廷別旨。成循官司舊規。故言集本省卽南省官也。集學士兩省臺官者。容有內制。給

舍中丞之屬。集學士臺省及諸司四品以上者。容有卿監之屬。集文武百官者。容有諸衛之屬。故謀事有大小。集官有等降。率繫詔文。昨因段少連以覆諡小事。謂羣牧普會議列爲具奏。嬰以嚴科。遂使絕曹清列。還入本行。而良規援求故實。理當難奪。請自今有臣僚擬諡者。止令集南省官屬。或緣事體大。臨事敕。判兼召三省臺寺。卽並依國朝舊例施行。御史臺別奏云。良規稱尙書省官。任外制者。不著臺省之籍。故有絕曹之語。而以爲重。則今尙書省官。任內制者。並係臺省之籍。寧有坐曹之實。而可輕乎。然則論職官之言。正爲絕曹者設。豈有受祿則繫官。定俸議事則絕曹爲辭。況王旦。王化基。趙安仁。晁迥。杜鎬。楊億。皆時之重望。嘗集議于尙書省。而無變古之論。故相李昉爲主客郎中。知制誥。日屢經都省議事。與散騎常侍徐鉉言。見江南舊儒所說議事次第。與此略同。又議大事。僕射御史大夫入省。惟僕射至廳下馬。于今行之。蓋所以重本省也。故都堂會議。列狀以品。就坐以官。忽此更張。恐非通理。請自今但係本省官帶職。令赴議。而輒不集者。如議國家典禮。卽從違制論施行。若議常事。止依律文處分。又祕書省著作郎直集賢院。同知太常禮院吳育言。若從本省敍官之議。有不可者二。且自朝廷至臺省。以及郡縣。上下有次。輕重有倫。至上莫若君父之前。至重莫若朝廷之內。上可以統下。重可以臨輕。舉重則不可以輕者干。舉上則不可以下者撓。夫尙書省雖制度尊大。亦天子之有司。官繫其中。謂之本省。本省相會。須有朝廷。豈有君父之前。朝廷之內。列班殊隔。一入有司。輒易尊卑。而云在朝敍職。入省敍官。以一體爲二家。以朝省爲

彼我上下異貫。輕重不倫。此其不可一也。官職之名。本非二體。官主其號。職供其職。名實相繫。豈有殊途。只如庖人是官。供庖是職。祝人是官。致祝是職。以何隔絕。分官職爲兩事。蓋自唐室以來。臨事雜置。遂有別帶職事之名。厥後因循。未歸本務。卽今而言。須以隸名爲輕。供職爲重。倘云入朝敍職。入省敍官。則是官職相離。遂爲限絕。推之于古。蓋紊源流。此其不可二也。若從絕班不赴之議。有不可者三。古者尙書爲天下綱轄喉舌之地。故其官皆材識之士。凡國有謀議。取決其中。今則不然。惟以敍遷。而其間拔擢英異。又多歸侍從之中。若絕班不赴。則朝事諮決。未盡其人。此不可一也。知制誥稱中書省奏班簿。是謂絕班。可以不赴。本省如翰林學士。亦知制誥。而不絕班簿。此皆因循之制。參差不倫。未可取爲確據。縱絕班有例。而絕曹無聞。謹按唐六典。中書舍人以他官兼者。謂之兼制誥。故白居易草楊嗣復授庫部郎中知制誥辭云。前代制誥。中書令侍郎舍人通掌之。國朝以來。或以它官兼領。又授元稹中書省舍人辭云。元稹自祠曹員外。試知制誥。謂之兼。則豈絕本官。謂之試。則明未正職。斯皆章灼不疑之事也。今縱有明文。絕其官。若遇定事。猶當以事體追而正之。況無明文。但引因循參差之事爲據。此不可二也。今兩制遷改。其告身命辭。必舉本曹之務爲之訓諭。凡受一敕牒。則下至府寺冗局。猶供其職。豈有一人命書。三省連判。而都無所繫。若止爲俸錢。徒加官號。命官之理。豈若是乎。惟兩府大臣。不可更親有司之事。況其俸祿。亦不繫其官。自餘縉紳遷次。所主者官名。俸給盡從本省。居常旣不復至。會議又不一來。則是自絕其官矣。

仲尼不去餼羊。粗存告朔之禮。若并羊亦去。寄禮無地。則一省之制。自此盡墜。縱以班絕。皆可不赴。若有詔兩制臺省百官諸司畢會。則坐次又如何爲定。此其不可三也。臣伏謂是非之議。至當歸一。若又廣爲採摭。適足爲煩。今于國朝典故中。取一最明之事。足以質定。大中祥符五年。敕新授僕射于都省上事曰。僕射尚書丞郎中員外三司使副學士兩省御史臺文武諸司常參官。並集省內幕次。以俟僕射自正衙退。將至都省堂門外下馬。朝廷差人前導。諸行尚書丞郎中員外郎。并于都堂門內分左右列班迎候。俟僕射判案訖。知班引贊官報班次。定禮生贊三司使次學士次兩省待制次三司副使賀。此則雖赴本省自有次序之別。臣切詳禮院御史臺兩奏。各有未安。請自今凡尚書省會議。如止集本省官。則帶職者皆赴。依在朝兩制班列。別作一行而坐。春秋之義。王人雖賤。必敍乎諸侯之上。所以尊王命而廣臣恭也。今兩制侍從之職。皆朝廷拔擢殊才。王命所旌。禮當表異。況又自分行列。非以相壓。亦如僕射上事之儀。凡帶絕班之官並赴。而別班贊引。不與本省官同在迎班。顯合本朝之典章。亦非今日之臆斷。若詔兩制臺省諸司諸衛官畢集。則各從其類。自作一行。其書議亦如其坐次。上以羣議所執不同。故參用所宜。而降是詔。

治平三年翰林學士承旨張方平奏。切見嘉祐五年。諫院陳升之言。三班供奉官以下。八千八百人。乞裁冗濫。立條制。于時定議事頗酌中。升之始言八千八百餘員。及此又已五年。數當增倍。其濫如此。而不云

救何以立憲度。建治功。乞下兩府檢討前所奏議。早爲裁定頒行。亦振舉頽弊之一端。詔以付樞密院。而計三班使臣六千五百三十四人而已。遂無所更議。

元祐三年。詔文臣繫銜分左右。〔案〕九朝編年。詔文臣繫銜分左右。自朝議至金紫光祿進士爲左。餘人爲右。紹聖二年罷之。崇寧二年復分左右繫銜。原本誤作繫御。紹聖崇寧下俱失載。二年兩字。自朝議

以上進士爲左。餘人爲右。明年詔朝議以下並分左右。紹聖罷之。惟朝議以上如故。崇寧又詔朝議中散正議光祿分左右兩資。應轉者先右而後左。蓋元祐之分左右。所以別流品。崇寧之分左右。特以序官爵耳。

龍圖閣學士一員。〔原註〕大中祥符三年置。龍圖閣直學士七員。〔原註〕內一員兼景德四年置。龍圖閣待制三員。〔原註〕景德元年置。直龍圖閣五員。

〔原註〕大中祥符九年置。

天章閣學士。〔原註〕慶歷七年置。侍講。〔原註〕自賈昌朝始。直天章閣。〔原註〕政和六年始置。

大觀二年二月十三日。詔曰。朕惟哲宗皇帝。英文睿武。神機獨運。道與時俱。沉潛無方。然事天治人。彰善癉惡。訓迪有位。攘卻四夷。則號令指揮。若揭日月。蓋自親覽庶政。始大有爲。一話一言。罔不儀式。刑于神考之典。故緝熙紹復。著在簡編。與熙寧元豐之所行。相爲始終。比命有司。廣加哀輯。成書來上。本末粲然。

誠可傳無窮。施罔極矣。若昔祖宗述作。皆有寶藏之所。參列廣內。揭爲嘉名。擇儒臣以資訪納。今將祇奉成憲。匹休前烈。則夫名出于信。不可無所攷也。在詩有之。君子有徽猷。是爲論德之美。而觀道之成。于是乎在。其哲宗皇帝御集建閣。以徽猷爲名。仍置學士直學士待制。政和六年增置直閣。

紹興十年五月七日。詔門下。恭惟徽宗皇帝躬天縱之睿資。輔以日就之聖學。因時制治。修禮樂。恢學校。發揮典墳。緝熙治具。宸章奎翰。發爲號令。著在簡編者。煥乎若三辰之文麗。天垂光。賁飾羣物。所以貽謀立教。作則萬世者。殆與詩書相表裏。特加哀輯。崇建層閣。以嚴寶藏。用傳示于永久。其閣恭以敷文爲名。祇適舊章。宜置學士直學士待制。直閣。以次列職。備西清之咨訪。爲儒學之華寵。其著于令。

直祕閣校理。自建隆初。三館有書萬二千餘卷。乾德元年後。平諸國。盡收其圖書。以實三館。先是朱梁都汴。正明中。始以右長慶門東北廬舍十數間。列爲三館。湫隘卑濕。纔蔽風雨。周廬徼道。出于其側。衛士騶卒。朝夕喧雜。歷代以來。未遑改作。每諸儒受詔。有所論撰。卽移于他所。始能成之。太平興國初。太宗因幸三館。顧左右曰。若此之陋。豈可以蓄天下圖籍。延四方之士耶。詔經度左升龍門東北。舊車輅院。別建三館。命中使督其役。制度皆上所規畫。二年三月。書院成。盡徙舊館之書。以實之。凡八萬餘卷。端拱元年。詔分三館之書萬餘卷。別爲書庫。目曰祕閣。以吏部侍郎李至兼祕書監。

〔案〕吏部原本誤作禮部。攷東都事略。李至傳。至授禮部侍郎。遷吏部爲祕書監。長

編亦作吏部  
今據以改正

右司諫直史館宋泌兼直祕閣右贊善大夫史館檢討杜鎬爲校理而直祕閣祕閣校理之官始于此

祕書省監少監丞各一人監掌古今經籍圖書國史實錄天文歷數之事少監爲之貳而丞參領之其屬有五著作郎一人著作佐郎二人掌修纂日歷祕書郎二人掌集賢院史館昭文館祕閣圖籍以甲乙丙丁爲部各分其類校書郎四人正字二人掌校讎典籍刊正訛謬各以其職隸于長貳惟日歷非編修官不預歲于仲夏曝書則給酒食費尙書學士侍郎待制兩省諫官御史並赴遇庚伏則前期遣中使諭旨聽以早歸大典禮則長貳預集議所以待遇儒臣非他司比宴設錫予率循故事宋初置三館長慶門北謂之西館太平興國初于升龍門東北創立三館書院三年賜名崇文院遷西館書貯焉東廊爲集賢書庫西廊分四部爲史館書庫大中祥符八年創外院于右掖門外天禧初令以三館爲額置檢討校勘等員檢討以京朝官充校勘自京朝幕職至選人皆得備選以內侍二人爲勾當官通掌三館圖籍事孔目官表奏官掌舍各一人又有監書庫〔案〕監書庫原本誤作監內庫今據宋史改正內侍一人兼監祕閣圖籍孔目官一人祕閣係端

拱二年就崇文院中堂建閣以三館書籍真本并內出古畫墨蹟等藏之淳化元年詔次三館置直閣

〔原註〕以朝官充校理〔原註〕以京朝官充以諸司三品兩省五品以上官一人判閣事直閣校理通掌閣事掌繕寫祕閣所



藏供御人裝裁匠十二人。元豐五年職事官貼職悉罷。以崇文院爲祕書省官屬。始立爲定員。分案四。置

吏八。

〔原註〕崇文院太平興國三年置。端拱二年建祕閣于院中。昭文館、史館、集賢院皆沿唐制立名。但有書庫寓于崇文院廡下。三館祕閣崇文院各置貼職官。又有集賢殿修撰、直龍圖閣、校勘、通謂之館閣。初英宗謂輔臣曰：館閣所以育雋材。比選數人出使。

無可者豈乏材耶？歐陽修曰：今取材路狹。館閣止用選人編校書籍。故進用稍遲。上曰：卿等各舉數人。雖親戚世家勿避。于是宰相琦、公亮參知政事修、槩各薦五人。未及試。神宗登極。先召十人。試以詩賦。而開封府界提點陳汝義別以奏對稱旨。預試。于是御史吳申言：試

館職者請策以經史及世務。毋用辭賦。遂詔自今試館職專用策論。熙寧二年置崇文校書。始除河南府永安主簿邢恕。乃詔自今應選舉可用人。並除校書。候二年取旨。除館職官。五年以隸祕書省。元祐初復置直集賢院校

理。自校理而上。職有六等。內外官並許帶恩數。仍舊。又立試中人館職法。選人除正字。京官除校書郎。

〔原註〕校書郎供職二年。除集賢校理。祕書郎著作佐郎。比集賢校理著作郎。比直集賢院直祕閣丞。及三年除祕閣校理。三年二月詔御試唱名日。祕書丞至正字。升殿侍立。九

月復試賢良于閣下。五年置集賢院學士。并校對黃本書籍官員。〔原註〕紹聖初罷校對。以編修日歷。選本省易集賢院學士爲修撰。直院爲直祕閣。集賢校理爲祕

書校理。〔案〕修撰上。宋史有殿字。攷紹聖二年易集賢院學士爲修撰。政和間改爲右文殿修撰。宋史因誤爲殿修撰。其實宋時無此稱。當以此書爲正。十二月詔禮部本省長貳定校讎之課。月終

具奏。〔原註〕入伏午時減半。過沒伏。依舊從蘇軾之請。〔案〕沒伏。宋史誤作渡伏。當從此書爲正。又罷本省官任滿除館職法。元符二年詔職事官罷帶館職。悉

復元豐官制。崇寧五年詔館閣並除進士出身人。政和五年四月詔祕書省殿。以右文爲名。〔案〕宋史置右文殿。在政和六

年此書作五年四月。攷九朝編年亦在五年四月。足證宋史之誤。

改集賢殿修撰爲右文殿修撰。

〔案〕集賢殿修撰下原本脫爲右文殿修撰六字。今據宋史增入。

是月。駕詣景靈宮朝

獻還。幸祕書省。詔曰。延見多士。歷覽藏書之府。祖宗遺文在焉。屋室淺狹。甚非稱太平右文之盛。宜重行修展。八月。詔祕書省移于新左藏庫。以其地爲堂。七年。詔類集所訪遺書。名曰祕書總目。宣和二年。立定祕書省員額。監少監丞。依元豐舊制。著作郎以四員爲額。校書郎二員。正字四員。渡江後。制作未遑。紹興元年。始詔置祕書省。權以祕監或少監一員。丞著作郎佐各一員。校書正字各二員。爲額。續又參酌舊制。校書郎。正字。召試學士院。而後命之。自是探求闕文。補綴漏逸。四庫書略備。卽祕書省。復建史館。以修神宗。哲宗實錄。選本省官兼檢討。校勘。以待從官充修撰。五年。倣唐人十八學士之制。少監丞外。置著作郎。佐。祕書郎各二人。校書郎。正字。通十二人。又移史館于省之側。別爲一所。以增重其事。九年。詔著作局。惟修日歷。遇修國史。修實錄。則開實錄院。以正名實。十三年。詔復每歲曝書。曾是冬新省成。少監游操。援政和故事。乞置提舉官。遂以授禮部侍郎秦熺。令掌求遺書。仍鑄印以賜。置編定書籍官二人。以校書郎。正字充。孝宗卽位。詔館職儲養人才。不可定員。乾道九年。正字至六員。淳熙二年。少監並置。皆前所未有。除少監丞外。以七員爲額。尋復詔不立額。

〔案〕乾道淳熙係孝宗年號。與江陽譜所云。起建隆迄宣和者。已不合。至下文所記紹熙係光宗年號。非李攸所及見。當是後人所增。

紹熙二年。館

職闕人。上令召試二員。謹加審擇。取學問議論平正之人。自是少監丞外。多止除二員。是時陳傅良上言。

請以右文祕閣修撰并舊館閣校勘三等爲史官自校勘供職稍遷祕閣修撰又遷右文在院三五年如有勞績就遷次對庶幾有專官之效無冷局之嫌時論譴之然不果行中興分案四曰經籍曰祝版曰知雜曰太史吏額都副孔目官二人四庫書官二人表奏官書庫官各一人守當官二人正名楷書五人守闕一人正貼司及守闕各六人監門官一人以武臣充專知官一人日歷所隸祕書省以著作郎著作佐郎掌之以宰執時政記左右史起居注所書會集修撰爲一代之典舊于門下省置編修院專掌國史實錄修纂日歷元豐三年詔宣徽院等供報修注事自今更不供起居院直供編修院日歷所四年十一月廢編修院歸史館官制行屬祕書省國史案六年詔祕書省長貳毋得預著作修纂日歷事進書卽繫銜以防漏洩如舊編修院法焉八年詔吏部郎中曾鞏禮部郎中林希兼著作職事官兼職自此始元祐五年移國史案置局專掌國史實錄編修日歷以國史院爲名隸門下省更不隸祕書省紹聖二年詔日歷還祕書省宣和二年詔罷在京修書諸局惟祕書省日歷所係元豐國史案除著作官專管修纂日歷之事無定員外其餘案編修日歷書庫官吏並依元豐法紹興元年初修皇帝日歷詔依修日歷所爲名本省長貳通行修纂三年詔宰臣提舉侍從官修撰十一月詔以修國史日歷所爲名四年詔以史館爲名十年詔依舊制併歸祕書省國史案以著作佐郎修纂舊史館官罷歸元官尋復詔以國史日歷所爲名續併修神宗哲宗寶訓隆興元年詔編類聖政所併歸日歷所依舊

宰臣提領。仍令日歷所吏充行遣。

會要所以省官。通任其事。紹興九年。詔祕書省官。讎校國朝會要。逐官添給茶湯錢。乾道四年。詔尙書右僕射陳俊卿兼提舉編修國朝會要。每遇提舉官開院過局。就本省道山堂聚呈文字。提舉諸司官承受。主管諸司官。並令國史日歷所官兼。五年。令本省再加刪定。以續修國朝會要爲名。九年。祕書少監陳騏言。編類建炎以後會要成書。以中興會要爲名。並從之。其後接續修纂。並隸祕書省。

初。紹興三年。詔置國史院。重修神宗哲宗實錄。以從官充修撰。續以左僕射呂頤浩提舉國史。右僕射朱勝非監修國史。四年。置直史館。及檢討校勘各一員。五年。置修撰官二員。校勘無定員。是時國史實錄皆寓史館。未有置此廢彼之分。九年。修徽宗實錄。詔以實錄院爲名。仍以宰臣提舉。以從官充修撰。同修撰。餘官充檢討。無定員。明年。以未修正史。詔罷史館官吏。併歸實錄院。二十八年。實錄書成。詔修三朝正史。復置國史院。以宰臣兼修。侍從官兼同修。餘官充編修。明年。詔國史院以宰臣提舉。置修國史。同修國史。共二員。編修官二員。又置都大提舉。諸司官承受官。諸司官各一員。以內侍省官充。隆興元年。以編類聖政所併歸國史院。命起居郎胡銓同修國史。二年。參政錢端禮權監修國史。乾道元年。參政虞允文權提舉國史。皆前所未有。二年。詔置實錄院。修欽宗實錄。其修撰檢討官。以史院官兼領。四年。實錄告成。詔修欽宗正史。以右僕射蔣芾提舉四朝國史。詔增置編修官二員。續又增置三員。淳熙三年。特命李燾以祕

書監權同修國史。權實錄院同修撰。四年罷實錄院。專置史院。十五年四朝國史成書。詔罷史院。復開實錄院。修高宗實錄。〔案〕此下所記慶元嘉泰係寧宗年號。且有修孝光兩朝實錄事。當亦後人所增。慶元元年開實錄院。修纂孝宗實錄。六年詔實錄院

同修撰。以四員檢討。官以六員爲額。嘉泰元年開實錄院。修纂光宗實錄。二年復開國史院。自是國史與實錄院並置矣。實錄院吏兼行國史院事。點檢文字一人。書庫官八人。楷書四人。

太史局掌測驗天文。攷定歷法之事。日具所占以聞。歲頒歷于天下。則豫造進呈祭祀冠昏及大典禮。則選所用日。其官有令。有正。有春官。夏官。中官。秋官。秋官正有丞。有直長。有靈臺郎。郎有保章正。其判局及同判。則選五官正以上。業優攷深者充。保章正五年直長。至令十年一遷。惟靈臺郎試中乃遷。而挈壺正無遷法。其別局有天文院。測驗渾儀。刻漏所。掌渾儀臺。晝夜刻驗辰象。鐘鼓院。掌文德殿鐘鼓樓。刻漏進牌之事。

印歷所。掌雕印歷書。南渡後並同隸祕書省。長貳丞郎輪季點檢。

算學。元豐七年詔四選命官。通算學者許以吏部就試。其合格者上。等除博士。中次爲學諭。元祐元年初議者謂本監雖準朝旨造算學。元末興工。其試選學官亦未有應格。竊慮徒有煩費。乞罷修建。崇甯三年遂將元豐算學條制修成。敕令五年罷算學。令附國子監。十一月從薛昂請復置算學。大觀三年太常寺攷究以黃帝□先師自常先力牧至周王朴以上從祀。凡七十人。四年以算學生併入太史局。後入祕書

省宣和二年並罷官吏。〔案〕自祕書省以下至此俱見宋史職官志永樂大典則以此爲宋朝事實內有光甯兩朝年號當非原書江陽譜稱攸書成上之緘封副本啓案檢不報藏于家則是書或爲其子孫所增而宋史採之

雍熙元年改甌院爲登聞檢院東延恩甌爲崇仁檢南招諫甌爲思諫檢西申寃甌爲申明檢北通玄甌爲招賢檢。〔案〕此條見江少虞事實類苑今採錄補入攷九朝編年甌院舊隸諫院至是改爲登聞院仍命諫院令司諫一人主判此書載之未詳

太宗時始置磨勘差遣院後改爲審官院眞宗時京朝官四年乃得遷天聖中方有三年之制而在外任者不得遷須至京引對乃得改秩明道中始許外任滿歲亦遷。〔案〕九朝編年景德四年七月立京朝磨勘限初令現任京朝官三年方得磨勘遷官大中祥符九年初

令京朝官在外任滿三年當攷課者附驛上聞是三年之制京朝官及外任滿歲得遷皆眞宗時事也此書作大聖明道當爲仁宗時事與九朝編年互異時恭謝天地覃恩不隔磨勘有併遷者于

是朝士始多皇祐明堂覃恩隔磨勘人情苦其不均英宗神宗卽位因有恭謝之例。〔原註〕一本云太宗用趙普議置攷課院審官院以

分中書之權是也。〔案〕宋史趙普卒在淳化三年七月審官院攷課院置在四年五月攷九朝編年云從蘇易簡之請也此書作趙普或當時普先有此議至是因易簡請始行之也

景祐二年十月辛亥詔曰國家分命羣官外釐庶務每代還于京輦或寓止于客坊雜處囂卑頗罹瀆慢稽信書于徃載有朝邸之舊規爰飭攸居用昭予眷宜于京師置朝集院

神宗置大理寺以上府左右院暨司錄獄無以離合訊辯三司混金穀視獄不專詔曰稽參故事宜屬理

官初置大理寺命李清臣爲記清臣以謂王者立政以詔天下必辭尙體要則書爲近迺倣古立言所以導事者詞灑彊奇甚其載上訓之略曰五教未訓五法亟下是曰暴民治用弗格〔案〕此句下疑有脫文以成上德意

先教後刑之敍上曰卿言逼近經誥

內侍省大中祥符二年內臣冠以省號初補曰小黃門遷內侍黃門遷內侍高班遷內侍高品遷內侍殿

頭其極爲都都知

〔案〕宋史內侍省有都都知有都知有副都知則其極當爲都都知原本誤作都知今據宋史改正

國朝諸司使止于宣政真宗以內侍李神福有

功特置宣慶使以寵之又以劉承珪特置景福殿使名以寵之班在各省使之上又以秦翰久在邊隅宣力勤蓋特置入內都都知以寵異之

唐自開元天寶以後藩鎮屯重兵皆自贍租賦所入名曰送使留州其上供者鮮矣五代疆境偪蹙藩鎮益強率令部曲主場院厚斂其屬三司者補大吏以臨之輸額之外頗以入己太祖歷試艱難周知其弊及受命務恢遠略革弊以漸國初猶循前制牧守來朝皆有貢奉以助軍實乾德三年詔諸州度支經費外凡金帛悉送闕下無得占留〔案〕七編趙普爲相勸上革去其弊申命諸州度支經費外金帛悉送都下無得占留註云去年已有此詔故云申命與此詳略不同時藩鎮有闕稍命文

臣權知所在場務或以京朝官廷臣監臨凡一路之財置轉運使掌之一州之財置通判掌之爲節度防禦團練留後觀察刺史者皆不預簽書金穀之事于是外權削而利歸公上矣其轉運使職位國初但曰

勾當某路水陸計度轉運事官高者則曰某路計度轉運使。太平興國初皆曰使。兩省五品以上則爲都轉運使。又置副使判官。又置同勾當轉運事。俄罷諸副使。止置使二員。明年復置副使。真宗每用兵。或令都部署兼都轉運使。或提點轉運事。及車駕巡狩。置隨軍轉運使。事畢卽停。真宗嘗曰。天下物宜。民間利病。惟轉運使得以周知。當召見訪問外事。上又嘗戒諸路轉運使曰。汝等所至。點檢公事。固是常職。若州郡相承弊事。但且改正。切勿亟行刑罰。致其滋蔓。害及無辜也。

景德元年。詔權三司使丁謂等。取戶稅條敕。及臣民所陳農田利害。刪定成農田敕五卷。上之。二年。謂等又取唐開元中。宇文融請置勸農判官。檢校戶口田土僞濫等事。且言別置官。慮益繁擾。而諸州長吏。職當勸農。乃請少卿監刺史。閣門使以上。知州者。並兼管內勸農使。餘及同判。並兼勸農事。諸路轉運使副。並兼本路勸農使。詔可。勸農事入銜。自此始。景德四年正月。詔諸路提點刑獄官。爲勸農使。使臣爲副使。凡農田事。悉領焉。置局案鑄印以給之。

先是。軍巡及馬步院判官。皆用郡府吏。建隆元年。始詔兩京軍巡。諸州馬步院判官。合吏部流內銓擇選人。無遺省聽減兩選補之。始用文吏也。

乾德三年。詔諸州長吏。或有煩藉人代判者。卽于賓佐中。擇公幹者充。不得更任親從人。先是承五代以來。領節旄爲郡守者。多武人。皆不知書。所至必自置吏。謂之代判。正事一以委之。用權不法。太祖知其弊。



罷之。

五代任官。凡曹掾簿尉。有齷齪無能。以至昏老。不任驅策者。始注爲縣令。故天下之邑。率皆不治。甚者誅求刻剝。穢迹萬狀。故天下優諱之言。多以長官爲笑。而祖宗深嫉貪吏。太祖嘗謂左右曰。晉漢之世。侯伯恣橫。非法陪斂。百姓田蠶所獲。未輸公稅。已入權豪之手。以至縣令將至。有年誅求百端。下無所訴。國朝以來。未革其弊。朕每念耕稼之勤。苟非兵食所資。固當盡復其租稅爾。建隆初。始以朝官爲知縣。其後參用京官。或試銜幕職。三班爲之。

〔案〕九朝編年。乾德元年六月。命朝官知縣。大理正奚嶼。知館陶。監察御史王祐。知魏縣。楊應夢。知永濟。屯田員外于繼微。知臨清。常葵。知縣。自嶼等始。此書作建隆初。與九朝編年。五異。

自是懲五代弊政。尤重親民之官。民政稍稍修舉。凡縣事主簿爲之佐。尉掌盜賊殺傷之事。而自五代以來。藩侯補署親隨。爲諸藩鎮副鎮都虞候。同掌驚邏盜竊之事。與縣令抗禮。凡公事專達于州縣多闕。簿尉建隆三年。復置縣尉主簿。掌鄉村盜賊。其鎮將所主郭內而已。自是稍統于縣。太平興國二年。始禁藩侯不得差親隨。其鎮將皆以本州將校爲之。縣尉專治賊盜。而民始無擾矣。開寶五年。縣令猶兼嶽廟令。尉兼廟丞。太平興國中。以令錄州官。老耄不治者爲廟令。判司簿尉老耄者爲廟主簿。

文武換官格。 中大夫。防禦使。 中大夫。團練使。 中散大夫。刺史。 〔原註〕候通除七年除團練使。 朝議大夫。刺史。 奉

直大夫。武功大夫。遙郡刺史。 〔原註〕舊皇城使。 朝請大夫。武德大夫。遙郡刺史。 朝散大夫。武德大夫。遙郡刺史。

〔原註〕舊內藏庫使。朝奉大夫。武節大夫。遙郡刺史。〔原註〕舊莊宅使。朝請郎。武略大夫。〔原註〕舊洛苑使。朝散郎。武義大夫。〔原註〕舊西京

使。〔原註〕舊禮賓使。朝奉郎。武義大夫。〔原註〕舊承議郎。武翼大夫。〔原註〕舊伊備庫副使。奉議郎。武節郎。〔原註〕舊莊宅副使。通直郎。武

義郎。〔原註〕舊禮賓副使。宣教郎。敦武郎。〔原註〕無舊身未及三年換修武郎。宣義郎。從義郎。承事郎。秉義郎。承奉郎。忠訓郎。

承務郎。忠翊郎。〔案〕此文武換官格。不著何年所定。據文獻通攷。謂神宗以大中大夫爲宰相官。故初除執政。只授中大。夫。舊爲祕書監殿中監之官。中奉大夫。大觀新置。中散大夫。朝議大夫。係卿監。奉直大夫。亦大觀新置。朝請大夫。朝散大夫。朝

奉大夫。係正郎。朝請郎。朝散郎。朝奉郎。係員外郎。承議郎。奉議郎。通直郎。係朝官。宣教郎。宣義郎。承事郎。承奉郎。承務郎。係京官。皆元豐以後之文階也。武階舊有正使副使。政和易以新名。自皇城使。至供備庫使。爲武功大夫。武德大夫。武顯大夫。武節大夫。武略大夫。武經

大夫。武義大夫。武翼大夫。自皇城副使。至供備庫副使。爲武功郎。武德郎。武顯郎。武節郎。武略郎。武經郎。武義郎。武翼郎。自內殿承制。至三班借職。爲敦武郎。修武郎。從義郎。秉義郎。忠訓郎。忠翊郎。成忠郎。保義郎。承節郎。承信郎。十者。並稱使臣。宋史職官志。載文臣換右職

之制。祕書監換防禦使。太卿監換團練使。祕書少監。太常光祿少卿。換刺史。少卿監換皇城使。遙郡刺史。自帶職郎中。至員外郎。換諸司正使。並帶遙郡刺史。自帶職博士。左右正言。監察御史。至太子左右贊善大夫。中舍。洗馬。換諸司副使。自祕書郎。著作佐郎。至判司簿尉

換內殿承旨。至三班奉職。以所載與通攷互證。文武之階。悉合。此書于文階。不載中奉大夫。武階。不載武顯大夫。武經大夫。武功郎。武德郎。武顯郎。武略郎。武經郎。武翼郎。修武郎。又武略大夫。武義大夫。武翼大夫。不著帶遙郡刺史。當並由傳寫遺闕。

勳臣

太祖義社兄弟。保靜軍節度使。楊光義。天平軍節度使。同平章事。兼侍中。石守信。昭義軍節度使。

兼侍中李繼勳 忠武軍節度使同平章事 中書令秦王王審琦 忠遠軍節度使 觀察留後劉慶義

左驍衛上將軍劉守忠 右驍衛上將軍劉廷讓 彰德軍節度使韓重斌 解州刺史王政忠(案)太祖勳臣不止

九人此九人中如楊光義劉慶義劉守忠王政忠四人東都事略及宋史俱無傳石守信諸人傳內亦無義社兄弟之名惟三槐王氏雜錄有云太祖即位方鎮多僭塞所謂十兄弟者是也可為此義社兄弟之證

配享

太祖室趙普曹彬 太宗室薛居正石熙載潘美 真宗室李沆王旦李繼隆 仁宗室王曾呂夷簡曹

瑋(案)文獻通攷載配享功臣自太祖至仁宗十一臣與此同復載英宗二臣韓琦曾公亮神宗一臣富弼哲宗一臣司馬光徽宗一臣韓忠彥高宗四臣呂頤浩趙鼎韓世忠張俊孝宗二臣陳康伯史浩光宗一臣葛邲此書不載富弼司馬光似因南渡後始定議

配享故未之及若韓琦曾公亮之配享英宗則早定自神宗時不當失載必由傳寫遺闕

# 宋朝事實卷十

## 宰執拜罷

楚昭輔。太平興國元年十一月。自右驍衛大將軍判三司副使。除檢校太保。左驍衛大將軍。充樞密使。  
〔案〕李燾長編。楚昭輔爲樞密使。在是年十月。庚申與宋史同。此書作十一月。與各書互異。

柴禹錫。太平興國七年四月。自如京使除宣徽北院使副使。

〔案〕宋史。宰輔表。柴禹錫兼樞密副使。此書去樞密二字。專稱副使。蓋宋以樞密院爲執政。此書類紀樞密拜罷諸

人姓名年月。故不復載。如下文稱知樞密院爲知院。同知樞密院爲同知。簽書樞密院事爲簽書。同簽樞密院爲同簽書。皆從此例也。

雍熙二年。罷爲左驍衛將軍。

眞宗嘗幸澶淵。

〔案〕眞宗原本誤作太宗。澶淵下。原本脫宋湜爲樞密副使。扈從九字。攷宋史。湜以眞宗咸平元年拜樞密副使。二年從幸澶淵。三年正月。以疾卒于道。今從宋史改正。

宋湜爲樞密副使。扈從

遇疾。眞宗許其先歸。賜以衾褥。且曰。此朕所常御者。雖故敝。亦足以禦道途之寒也。又遣中使護送之。次澶州。卒。眞宗再幸河朔。追悼之。加贈刑部尙書。諡忠定。湜秀穎有器識。又善引重。後進云。  
咸平二年己亥六月戊午。樞密使兼侍中曹彬卒。彬自至道三年八月復爲樞密使。是年六月卒。居樞府。

三年。彬性仁恕清謹。遜言恭色。在朝廷未嘗抗辭忤旨。亦未嘗言人過失。博覽強記。善談論。被服雅同儒者。伐二國。秋毫無所取。位兼將相。不以等威自異。彬歸休。閉閣門。無雜賓。保功名。守法度。近代良將。稱爲第一。

七月己丑。王顯樞密使。

〔原註〕自橫海軍節度使。兼御史大夫。依前檢校太尉充。

顯自太平興國八年六月。拜樞密使。淳化二年。罷。是年復

召拜樞密使。

咸平三年庚子二月癸亥。王顯罷樞密使。

〔原註〕自檢校太尉。罷爲山南東道節度使。同中書門下平章事。

顯再入樞府。踰半年。從真宗伐契丹。

車駕還京。乃以使相罷之。四年五月。顯以定州駐泊都部署。兼河北諸州水陸計度都轉運使。

同日。

〔案〕宋史宰輔表。周瑩。王繼英。王旦。同日拜除。皆在咸平三年二月。此云同日。蓋承上王顯二月罷樞密之文。上四年五月旬紀。顯次年事也。長編咸平四年載王旦同知院事。與此互異。

周瑩。王繼英。並知樞密院

事。〔原註〕瑩。自宣徽北院使。遷宣徽南院使。除繼英。自樞密都承旨。客省使。遷宣徽北院使。除。

王旦同知樞密院事。

〔原註〕自中書舍人。翰林學士。除。

瑩。瀛州人。繼英。開封祥符人。

旦。字子明。大名人。瑩少給事于晉邸。太宗卽位。擢簽書樞密院事。宣徽院諸房公事。諸房自後不復置云。

繼英事真宗于藩邸。至是。並知樞密院事。旦少好學。父祐器之。嘗手植三槐于庭。曰。吾之後必有爲三公者。真宗卽位。旦爲翰林學士。嘗奏事下殿。真宗目送之。曰。與朕致治天下。必此人。也是年。遂有此除。錢若

水名能知人嘗見且曰眞宰相器也若水爲樞密副使罷召對苑中問誰可大用者若水言且可大用眞宗曰吾固已知之矣

韓崇訓馬知節並簽書樞密院事崇訓自樞密都承旨四方館使遷檢校太傅除知節自樞密都承旨東上閣門使遷檢校太保除崇訓長厚謙畏未嘗忤物知節折節讀書至是並拜簽書樞密院事當是時契丹已盟中國無爲大臣方言符瑞知節每不然之言天下安不可存去兵忘戰之意景德四年丁未〔原註〕五年

改大中祥符

八月庚子韓崇訓罷簽書樞密院事爲齊州防禦使崇訓自景德三年二月召除簽書樞密院事是年八月罷在樞府踰年崇訓以目疾累表求罷從之

王欽若大中祥符五年九月自吏部尙書知樞密院監修國史除檢校太傅中書門下平章事監修國史充使十一月除檢校太尉七年六月罷權判都省

陳堯叟大中祥符五年九月自戶部尙書檢校太傅知樞密院修國史除本官同中書門下平章事監修國史充使七年六月罷

寇準大中祥符七年六月

〔案〕大中下原本脫祥符二字今增入

自兵部尙書除檢校太尉同中書門下平章事充使八年四

月罷爲武勝軍節度使同平章事

大中祥符八年乙卯。四月壬戌。王欽若、陳堯叟並樞相。

〔原註〕欽若自判尙書都省。知通銀臺司。兼中書門下封駁事。依前吏部尙書。同平章事。充樞密使。堯叟依前戶部尙書。檢校

太尉。同平章事。充樞密使。兼羣牧制置使。

欽若與堯叟。自祥符五年九月。並同平章事。充樞密使。後與堯叟同罷。至是復與堯叟並

命。

大中祥符八年四月壬戌。寇準罷樞密使。

〔原註〕自行兵部尙書。依前檢校太尉。同平章事。充武勝軍節度等使。

準自大中祥符七年六月。除中書

門下平章事。充樞密使。至是年四月罷。再任樞密。踰年。先是準惡三司使林特姦邪。數與爭忿。上謂王旦等曰。準年高。屢更事。朕意其必能改前非。今觀所爲。似更甚于疇昔。旦等曰。準好人懷惠。又欲人畏威。皆大臣所當避。而準乃以爲己任。此其所短也。非至仁之主。孰能全之。準之未爲樞密也。旦嘗得疾。未愈。上命肩輿入禁中。見于偏殿。問曰。卿今疾亟。萬一有不諱。使朕以天下付之誰乎。旦曰。知臣莫若君。惟明主擇之。再三問。不對。上曰。張詠何如。又問曰。亮何如。不對。上曰。試以意言之。旦強起舉笏曰。以臣之愚見。莫若寇準。上撫然有間曰。準性剛褊。更思其次。旦曰。他人臣所不知也。遂辭退。及準爲樞密使。中書行事。關送樞密院。礙詔格。準卽以聞。上謂旦曰。中書行事如此。施之四方。奚所則。旦再拜謝曰。此實等等過也。中書吏旣坐罰。樞密院吏皇皇告準曰。中書樞密院日有相干。舊例。止令諸房改易。不期奏白。而使宰相待罪。旣而樞密院有事。送中書。礙詔格。吏得之。欣然以呈。旦卻送與樞密院白。準準大慙。翌日。謂旦曰。王同

年大度如此耶。且不容。且每對上。必稱準之才。而準數短之。一日。上謂且曰。卿雖談其美。彼專道卿惡。且曰。理固然。臣在相位久。政事闕失必多。準對陛下。無所隱。益見其忠直。此臣所以重準也。上由是愈賢友。及準自知當罷。使人私于且。求爲使相。且大驚曰。使相安可求也。且吾不受私請。準憾之。既而上問且。準罷當何官可爲。且曰。準年未三十。蒙先帝擢置二府。且有才望。若使相。令處方面。其丰采亦足爲朝廷光也。及制出。準入見。流涕曰。非陛下知臣。何以至是。上具道且所以薦準者。準始愧歎。出語人曰。王同年器識。非準所可測也。

七月 〔案〕七月。卽大中祥符八年七月。以上文見。故不復載某年。攷宋史。王嗣宗以是月罷副使。與此書合。

戊午。王嗣宗罷樞密副使。 〔原註〕爲天平軍節度使。檢校太保。 嗣宗自大中祥

符七年七月。除樞密副使。至是年七月。罷在樞府踰年。嗣宗表求外郡。故有是命。後上章求退。而猶欲領郡。寇準爲相。惡之。卽以爲左屯衛上將軍。致仕。卒年七十八歲。贈侍中。諡景莊。

大中祥符九年正月丙辰。張旻樞密副使。 〔原註〕自侍衛馬軍副都指揮使。成塞軍節度使。檢校太保。遷宣徽北院使。除。 旻開封人。事眞宗于潛邸。及卽

位。以殿前都虞候從祀東封。是時盛興宮室。人皆爭奉符瑞。丁謂王欽若主其事。無敢議者。旻毅然謂土木之役。不足以承天意。是年正月。遂有此除。

八月甲申。陳堯叟罷樞相。 〔原註〕自樞密使。行戶部尚書。檢校太尉。同平章事。罷爲尙書右僕射。 堯叟自大中祥符八年四月。復爲同平章事。充樞



密使至是年罷再執政踰年久疾求領外任上遣閣門使楊崇勳至第撫慰且詢其意堯叟辭意懇確乃從之命其子齋告牒就第賜之尋命判河陽月給實俸歲賜公使錢百萬堯叟力疾求入辭肩輿至便殿詔勿拜賜坐又作詩餞其行卒贈侍中諡文忠堯叟偉姿貌強力奏對明辯多任智數久典機密軍馬之籍悉能記之父省華終左諫議大夫母馮氏性嚴毅弟堯佐景祐四年拜同中書門下平章事堯咨舉進士第一後以儒臣易武守仕至武信軍節度使

同日任中正樞密副使〔原註〕自樞密直學士給事中權知開封府遷工部侍郎除中正字慶之曹州濟陰人

同日馬知節知樞密院事〔原註〕自潁州防禦使知天雄軍召除檢校太尉兼宣徽南院使除〔案〕宋史宰輔表馬知節曹利用等四人同日除知樞密院事在天禧元年九月此書以年月載明本條下文直以同日二字起不載年

月殊為關略曹利用任中正周起並同知樞密院事〔原註〕利用自檢校太傅樞密副使加檢校太尉宣徽北院使除兼羣牧制置使中正自樞密副使兼刑部侍郎起自樞密直學士右諫議大夫遷給

事中起字萬卿淄州人

四月〔案〕宋史宰輔表馬知節罷在天禧二年閏四月此書失載某年直書四月不言閏殊為關略癸卯馬知節罷知樞密院事〔原註〕自檢校太尉宣徽南院使罷為彰德軍節度觀察留後知節自

天禧元年九月除知樞密院是年四月罷再入樞府凡七月恩顧極厚素病足特許內朝別為一班省其舞蹈未幾疾甚賜告上親臨其第謂之曰久不相見思卿而來病既久乃罷為節度留京師卒贈侍中諡

正惠知節慷慨以武力智謀自喜又能好書賓友儒者所與善必一時豪傑遇事審審未嘗有所顧憚天下至今稱其直云

六月〔案〕李燾長編曹利用知樞密院與丁謂並樞密使皆在天禧三年此六月上缺紀年乙未曹利用知樞密院事〔原註〕自檢校太尉宣徽北院使同知樞密院事兼羣牧制置使除十二月辛卯

曹利用丁謂並樞密使〔原註〕利用自檢校太尉宣徽北院使知樞密院事兼羣牧制置使除謂自吏部尚書參知政事除檢校太尉充時輔臣以郊恩俱進官故事嘗為宰

相而除樞密使始得遷僕射乃以謂為檢校太尉兼本官充使樞密使舊兼御史大夫自利用始去之再

入政府一年至四月拜相〔原註〕樞密使不兼御史大夫自曹利用始

同日任中正周起並樞密院副使〔原註〕中正自刑部侍郎同知樞密院事遷兵部侍郎除起自給事中同知樞密院事遷禮部侍郎除

天禧四年庚申正月乙丑曹瑋簽書樞密院事〔原註〕自華州觀察使鄜延路副都總管環慶秦鳳等州沿邊巡檢安撫使宣徽北院使鎮國節度觀察留後充瑋字寶臣樞

密使彬之子李繼遷擾邊諸將數出無功太宗問誰可任者是時彬在樞府對以瑋可任召知渭州時年

十九又知秦州秦州人立碑紀功有詔褒之至是遂有此命

錢惟演樞密副使〔原註〕自翰林學士刑部侍郎知制誥除〔案〕李燾長編天禧四年八月除錢惟演樞密副使下九月周起曹瑋即是年九月也與宋史宰相表合此書于錢惟演上闕載年月

九月丙辰周起罷樞密副使。〔原註〕自禮部侍郎罷為戶部侍郎知青州。

曹瑋罷簽書樞密院事。〔原註〕自宣徽北院使鎮國軍節度使觀察留後除罷為宣徽南院使環慶路馬步軍都

部署起自天禧元年九月除同知樞密院事三年十二月遷樞密副使是年九月罷在樞府三年丁謂用事

逐寇準而以周起為黨罷知青州又降太常少卿知光州謂得罪復禮部侍郎留守南京卒贈禮部尚書

諡安惠瑋自天禧四年正月除簽書樞密院事是年九月罷在樞府一年寇準謫道州丁謂惡瑋不附己

指為準黨出之未幾復降為左衛大將軍容州觀察使知萊州瑋自知宿將為謂所忌恐益為謂中即日

上道從弱卒十餘人不以弓鞭矢箠自隨謂敗乃復節度使卒贈侍中諡武穆治平中配享仁宗廟庭瑋

好讀書通左氏春秋為將幾四十年未嘗敗衄威震西鄙置勒斯賚〔案〕置勒斯賚原本誤作唵嘶囉今改正每聞其名以手加額

而東嚮之鎮天雄契丹使過必戒其下無敢疾驅者在渭州始置弓箭手其所措置後皆為法云子琮之

孫詩尚魯邠國大長公主〔案〕宋史魯國大長公主仁宗女治平四年封邠國熙寧九年改魯國此書作魯邠國攷公主未嘗封邠國或即邠字之誤琮累官至馬軍副都指揮使

張士遜天禧五年正月自樞密直學士右諫議大夫除本官副使

任中正自大中祥符九年九月除樞密副使天禧元年九月除同知樞密院事三年十二月除樞密副使

四年八月除參知政事是年〔案〕宋史任中正乾興元年六月以救丁謂謫知鄆州自大中祥符九年九月至是凡六年仁宗于是年二月戊午即位此書但云是年而不著乾興元年殊為闕略六月罷為

執政凡六年。事真宗五年。事仁宗纔數月。中正之貶。坐營救丁謂故也。後復禮部尚書。卒。贈左僕射。謚康懿。弟中師。仁宗時爲樞密副使。

張知白。乾興元年十一月。自翰林學士。尚書右丞。除本官副使。〔案〕宋史。張知白。乾興元年。自尚書右丞。除樞密副使。此書云本官者。卽指樞密而言也。天聖三年十二月拜相。

李稅。靖康元年正月。自正奉大夫。戶部尚書。除本官同知。三月。遷尚書右丞。

唐恪。靖康元年正月。自正議大夫。吏部尚書。除本官同知。三月。遷中書侍郎。

种師道。靖康元年正月。自靖難軍節度使。檢校少保。河東北路制置使。除同知。兼京畿河東路宣撫。二月。罷。守本官中太一宮使。

李綱。靖康元年正月。自尚書右丞。兼同知。兼親征行營使。二月。罷。三月。復故。兼都提舉城壁守禦使。四月。遷知院。

許翰。靖康元年三月。自朝散郎。御史中丞。除大中大夫。同知。八月。罷。

孟忠厚。紹興十二年某月。自少保。鎮潼軍節度使。判紹興府。除充使。某月。罷。爲福建路安撫使。〔案〕宋史。宰輔表。孟忠厚。

以紹興十二年九月。自護國軍節度。除樞密使。是年十一月。罷。爲少傅。知建康府。與此互異。

石熙載太平興國四年正月自樞密直學士兵部員外郎本官簽書院事四月遷副使〔案〕自石熙載以下至湯思退止類紀簽書同

簽書發遣領院事諸職攷宋以簽書樞密院為執政其同簽書發遣領院事特以類附載

王沔太平興國八年十一月自樞密直學士除右諫議大夫簽書院事雍熙元年十二月除左諫議大夫三年八月遷副使

張齊賢太平興國八年十一月樞密直學士除右諫議大夫簽書院事雍熙元年十二月除左諫議大夫三年七月罷為給事中

王守正端拱元年九月自內客省使除宣徽北院簽書院事

張遜端拱二年七月自鹽鐵使除宣徽北院使簽書院事淳化二年九月遷知院〔案〕長編九月甲辰以樞密副使張遜知樞密院事溫仲

舒寇準同知院事知院之名始此

向敏中咸平三年正月以參知政事權發遣

馮拯景德元年八月自給事中同知院改工部侍郎簽書二年四月遷參知政事

陳堯叟景德元年八月自給事中同知院改工部侍郎二年十一月除刑部侍郎三年二月遷知院

韓崇訓。景德三年二月。自樞密都承旨。除檢校太傅。簽書。四年八月。罷爲齊州防禦使。

馬知節。景德三年二月。自樞密都承旨。除檢校太保。簽書。大中祥符元年十一月。除檢校太傅。四年四月。

除宣徽北院使。五年九月。遷副使。

〔案〕長編景德三年二月。王欽若爲尙書左丞。簽樞密院事。陳堯叟知院事。韓崇訓。馬知節。並簽書院事。四人同日視事。此書前已載。欽若大中祥符五年。與陳堯叟並知院事。八

年。復與堯叟並樞相。而此處自石熙載簽書院事以下。並記簽書院事。及同簽書。發遣領院事。諸人姓名。及除罷年月。獨不載。王欽若簽院事。似有闕佚。

向敏中。大中祥符七年。以宰相權發遣。

曹瑋。天禧四年正月。自華州觀察使。鎮國軍節度觀察留後。除宣徽北院使。簽書。九月。罷爲宣徽南院使。

環慶路馬步軍都部署。

王德用。明道二年四月。自侍衛步軍副指揮使。福州觀察使。除檢校太保。同簽書。十一月。遷副使。

郭逵。治平三年四月。自容州觀察使。檢校太保。除同簽書。九月。安撫陝西。四年正月。加靖難軍節度使。四

月。還自陝西。九月。罷爲宣徽南院使。判鄆州。

曾孝寬。熙寧八年十二月。自龍圖閣學士。起居舍人。樞密都承旨。除樞密直學士。同簽書。元豐元年丁父

憂。

趙瞻。元祐三年四月。自中散大夫。戶部侍郎。除樞密院直學士。本官簽書。四年六月。遷同知院。

王富叟元祐六年二月自龍圖閣待制權開封府除樞密學士簽書七年五月罷爲端明殿學士知鄭州劉奉世元祐七年五月自朝請郎寶文閣待制除樞密直學士本官簽書紹聖元年五月罷爲端明殿學士知成德軍

童貫政和六年二月自少保護國軍節度使陝西河東路宣撫使簽書五月除檢校少傅威武節度使權領院事十二月除檢校少師寧江軍節度使領院事重和元年八月除太保河中節度使宣和元年八月除太保山南東道節度使二年十二月加劍南西川節度使三年八月除太師封楚國公四年七月以太師改豫國公致仕

鄭居中宣和二年十二月自少傅威武軍節度使中太一宮使權領院事三年五月落權字六年六月除太保威勝軍節度使燕國公致仕

童貫宣和四年五月落致仕前太師進封徐國公領院事陝西河北路宣撫使七年封廣陽郡王靖康元年二月責授左衛上將軍致仕

蔡攸宣和六年六月自少師安遠軍節度使寶籙宮使侍讀河東北路宣撫使除前少師領院事七年除太保燕國公靖康元年責大中大夫提舉亳州明道宮

耿南仲宣和七年二月自徽猷閣學士朝散郎太子詹事除資政殿學士簽書靖康元年遷尙書左丞

路允迪。靖康元年正月。自朝散郎。兵部尚書。除資政殿學士。簽書。二月。使河東。建炎元年。罷爲資政殿學士。提舉南京鴻慶宮。

宇文虛中。靖康元年二月。自資政殿學士。中大夫。除本官簽書。其月改資政殿學士。四月罷落職。

李回。靖康元年八月。自朝議大夫。御史中丞。除延康殿學士。簽書。十一月罷。提舉萬壽觀。

曹輔。靖康元年十一月。自承議郎。御史中丞。除延康殿學士。簽書。建炎元年五月卒。

張叔夜。靖康元年閏十一月。自延康殿學士。南道都總管。除簽書。建炎元年四月。扈從北狩。

路允迪。建炎三年二月。自資政殿學士。提舉洞霄宮。除本官簽書。四月。罷爲資政殿學士。提舉醴泉觀。兼侍讀。

呂頤浩。建炎三年。自大中大夫。吏部尚書。除資政殿學士。同簽書。江淮兩浙制置使。四月。拜相。

王淵。建炎三年。自嚮德軍節度使。御營都統制。除本鎮簽書。四月。遇害。

李邴。建炎三年三月。自翰林學士承旨。

〔案〕宋史。建炎三年。李邴自翰林學士。知制誥。除簽書。此書作承旨。與宋史互異。

朝奉郎。除端明殿學士。本官同。

簽書。四月。遷尚書右丞。

鄭穀。建炎三年二月。自朝散郎。御史中丞。除端明殿學士。同簽書。四月。落同字。七月卒。



滕康建炎三年五月自翰林學士承旨朝散郎除端明殿學士簽書七月除資政殿學士同權三省樞密院從隆祐太后幸洪州

周望建炎三年七月自朝奉大夫兵部尙書除端明殿學士同簽書九月宣撫荆湖江浙十二月遷同知

張守建炎三年七月自翰林學士承旨朝奉郎除端明殿學士同簽書四年四月遷參知政事〔案〕宋史張守自翰林學

士知制誥同簽書在九月參知政事在四年五月此書作承旨除同簽書在七月參政在四月與宋史互異

趙鼎建炎四年五月自翰林學士承旨朝奉大夫除端明殿學士簽書十一月罷提舉洞霄宮〔案〕宋史趙鼎自翰林學

士承旨除端明殿學士簽書十一月罷提舉洞霄宮原本學士下脫簽書十一月罷六字今據宋史增入

富直柔建炎四年十一月自奉議郎御史中丞除端明殿學士朝奉郎簽書紹興元年遷同知

權邦彥紹興二年五月朝議大夫兵部尙書除端明殿學士簽書八月兼權參知政事三年二月卒

徐俯紹興三年二月自翰林學士承旨中大夫除端明殿學士簽書四年五月罷〔案〕宋史徐俯以紹興四年四月罷簽事此作五月與宋

史互提舉洞霄宮

韓肖胄紹興三年七月自中大夫吏部侍郎除端明殿學士同簽書充大金軍前通問使四年五月罷知

温州。〔案〕宋史韓肖胄同簽書。在紹興三年五月。此作七月。罷在四年正月。此作五月。與宋史互異。

胡松年。紹興四年七月。自朝奉大夫。吏部尚書。除端明殿學士。簽書。遷罷年月闕。〔案〕宋史胡松年罷簽書。在紹興五年閏二月。

折彥質。紹興六年二月。自朝議大夫。兵部尚書。除端明殿學士。簽書。兼權參知政事。十二月。罷提舉洞霄宮。

韓肖胄。紹興八年十二月。自端明殿學士。知常州。除本職。簽書。使大金。十年。使還。罷知紹興府。王倫。紹興八年十二月。自龍圖閣學士。除端明殿學士。同簽書。其月。罷。以本官職。留守東京。

樓炤。紹興九年三月。自翰林學士承旨。朝奉郎。知制誥。除端明殿學士。簽書。十年六月。丁母憂。

何鑄。紹興十年六月。自御史中丞。朝奉郎。除端明殿學士。簽書。尋出使。〔案〕宋史何鑄以紹興十一年十一月。除簽書。遂出使金。此作十年六月。與宋史互

異。十二年五月。使還。七月。兼權參知政事。八月。罷。提舉江州太平觀。

程克俊。紹興十二年。自翰林學士承旨。朝奉郎。除端明殿學士。簽書。兼權參知政事。十三年二月。罷。兼權。七月。罷。提舉江州太平觀。

樓炤。紹興十四年二月。自資政殿學士。知紹興府。移知建康府。過闕。以本官簽書。兼權參知政事。四月。罷。

提舉江州太平觀。

李文會紹興十四年五月自奉議郎御史中丞除端明殿學士本官簽書兼權參知政事十一月罷。

〔案〕宋史

李文會罷簽書在十二月。此作十一月與宋史互異。落職奉議郎提舉江州太平觀。

楊愿紹興十四年十一月自通直郎御史中丞除端明殿學士朝奉郎簽書兼權參知政事十五年罷。

〔案〕宋史楊愿除簽書在十二月此作十一月。與宋史互異罷在十五年十月此失載某月。提舉江州太平觀。

李若谷紹興十五年九月自敷文閣直學士朝議大夫樞密都承旨除端明殿學士簽書。

〔案〕宋史李若谷除簽書在紹興十

五年十月此作九月與宋史互異。十七年正月遷參知政事。

何若紹興十七年正月自奉議郎御史中丞除端明殿學士朝奉郎簽書三月罷提舉江州太平興國宮。

詹大方紹興十八年八月自朝奉郎工部尙書除端明殿學士本官簽書兼權參知政事十一月卒。

〔案〕宋史

詹大方以紹興十八年九月卒以余堯弼代之。卽在是年十月此俱作十一月與宋史互異。

余堯弼紹興十八年十一月自朝散郎御史中丞除端明殿學士本官簽書兼權參知政事二十年三月。

遷參知政事。

巫伋紹興二十年三月自朝奉郎給事中除端明殿學士本官簽書兼權參知政事二十一年四月使大金爲祈請使是歲還仍兼權參知政事二十二年二月罷落職。〔案〕巫伋除簽書在紹興二十年二月此作三月罷在二十二年四月此作二月與宋史互異。提舉太平興國宮。

章復紹興二十二年四月自朝散郎諫議大夫除端明殿學士本官簽書兼權參知政事十月罷落職提舉太平興國宮。

宋樸紹興二十二年十月自奉議郎御史中丞除端明殿學士朝奉郎簽書兼權參知政事二十三年十月罷落職提舉太平興國宮。

史才紹興二十三年十月自朝奉郎諫議大夫除端明殿學士本官簽書兼權參知政事二十四年六月罷落職提舉太平興國宮。

魏師遜紹興二十四年自奉議郎御史中丞除端明殿學士朝奉郎簽書參知政事十一月罷提舉太平興國宮。

鄭仲熊紹興二十四年十二月自承議郎諫議大夫除端明殿學士朝奉郎簽書二十五年四月兼權參知政事五月罷落職提舉太平興國宮。

湯思退。紹興二十五年五月。自承議郎。禮部侍郎。直學士院。除端明殿學士。朝奉郎。簽書兼權參知政事。八月罷。

蔡懋。宣和六年九月。自朝議大夫。開封尹。除中大夫。同知。靖康元年。遷尙書左丞。

〔案〕自蔡懋以下。至張懋。皆紀宣和以後。尙書左右丞諸

人姓名。及除罷年月。而自宣和六年以前。皆闕。

葉夢得。字少蘊。蘇州吳縣人。官至尙書左丞。在鎮。以其子模。將數千人。守馬家渡。金人果使叛將酈瓊。將輕兵來襲。見有備。乃去。時以屯兵衆。歲費米八十萬斛。錢八百萬緡。權貨務所入。不足以贍。且命夢得兼總四路漕運。時江淮多難。甚賴之。以勞進觀文殿學士。

蔡仲熊。濟陽人。好學博聞。執經議論。往往與時宰不合。亦不改操。求同。歷年方至尙書右丞。當時憾其不遇。

王璠。以尙書右丞。爲京兆尹。自李諒後。政條墮弛。姦豪寢不戢。璠頗修舉政治。有名。進左丞。

王安中。字履道。號初寮道人。宣和中。爲翰林學士。遷尙書右丞。安中文學稱于時。靖康中。坐累謫象州。館于謝氏之扶疎堂。又建炎間。貶道州司戶。避寇寓臨賀。有和李師中布水寺詩。及稽古閣墨蹟。

李綱。爲尙書右丞。上欲親征。命綱爲東京留守。以李梲副之。時宇文粹中扈從東幸。綱建議守城。罷親征。辛未。上登宣德門。親勞問將士。命李綱。吳敏。撰數十語。示金人。犯順。欲危宗社。決策固守。各令勉勵之意。

俾閣下官宣讀一句。將士聲喏。須臾六軍皆感泣。于是固守之議始決。乃以綱爲親軍行營使。二月罷。後三日士庶伏闕言。綱不當罷。復除尙書右丞。都大提舉京城四壁守禦使。

張慤建炎元年六月。自中大夫戶部尙書除本官同知。至十一月遷尙書右丞。

忻州地震。災異數見。時陳堯佐與王隨同在相位。諫官論政事錯繆。由宰相不得人。堯佐亦先自援漢故事。數上章請行策免。下制曰。適因災異。繼有奏陳。慮煩宰制之勤。宜錫都俞之命。從優禮云。

曾布與韓忠彥同輔政。忠彥旣罷相。而布亦力請去位。乃有是命。未幾。臣僚論列。布與宦官閻守勲等相交結。使門人李士京。通道京語。暨陛下發揮睿斷。斥逐守勲。是時布在公堂。忽覺驚駭失色曰。昨日見李士京來。不言及今日何遽如此。又聞金山登雲門外。下鼻唐地。嘗有讖記。遂諷金山寺僧獻其地。又以常住地不可買。遂面欺。乞令潤州估價買之。王防獻賄于其子紆。納妾以事之。布亦薦用。朱彥任府界提點。日朝廷便錢往京西。紆與布之婿吳則禮攬客人便錢。所得息錢甚多。彥以此速進。陛下深察其奸。終以必去而不疑。可謂有人主之英斷矣。及其旣去。則譽以美詞。寵以要職。罪狀未著。天下惘然。于是落職提舉亳州明道宮。太平州居住。又責授賀州別駕。衡州安置。二年。又責授廉州司戶參軍。

〔案〕則條不著年月。此條首云。乃有是命。未云。

二年又責授。則原本必有元年罷相之文。而傳寫脫去。且陳堯佐王隨罷相。在景祐五年三月。韓忠彥曾布罷相。在崇寧元年五月。乃錯置建炎後。皆由傳寫淆亂。

興化軍仙遊人陳瓘。因朝會見蔡京視日久而不瞬。嘗以語人曰。京之精神如此。他日必貴。然矜其稟賦。敢敵太陽。吾恐此人得志。必擅私逞欲。無君自肆矣。尋居諫省。遂攻其惡。京聞瓘言。因所親以自解。且致情懇。而以甘言啖瓘。瓘使答之曰。杜詩所謂射人先射馬。擒賊必擒王。不得自己也。于是攻之愈力。草四章。將上。會聞隔對不得見。乃悉繳而奏之。

〔案〕宋史瓘以論皇太后預政。因罷監揚州糧料院。瓘出都門。繳四章上之。與此互異。

其奏曰。紹聖之初。哲宗之

意。本無適莫。章惇雖挾功自恣。然其初猶有兼取元祐之意。京自成都而來。與其弟卞。共毀宣仁。共欺哲宗。京之得售。其說自役法始。從大改役法以後。事事無不大改。兄弟同朝。塤籟相和。無有一事不如其意。當此之時。不以所聞神考聖訓。告于哲宗。至于今日。然後引所自書實錄。以爲證驗。唱爲不經之論。而欲遷神考于西宮。其爲矯誣。可謂明矣。京以矯誣之筆。妄增實錄之事。以矯誣之舌。僞造神考之訓。朝廷用矯誣之言。而輕改宗廟。信矯誣之說。而力沮言者。臣恐自此。矯誣之人。無復忌憚矣。今朝廷大政。又皆委曲遷就。而爲一京之地。公議洶洶。人不敢言。京當紹聖之初。與其弟卞。俱在朝廷。導贊章惇。共作威福。卞則陰爲謀畫。惇則果斷力行。且謀且行者。京也。哲宗篤于繼述。一于委任。事無大小。信惇不疑。卞于此時。假繼述之說。以主私史。惇于此時。因委任之篤。自明己功。京則盛推安石之聖。過于神考。以合其弟。又推定策之功。毀蔑宣仁。以合章惇。惇之矜伐。京爲有助。卞之乖悖。京實贊之。當此之時。言官常安民。屢攻其罪。京與惇卞。共怒安民。協力排陷。斥爲姦黨。而孫諤。董敦逸。陳次升。亦因論京。相繼黜逐。哲宗晚得鄒浩。

不由進擬。寘之言路。浩能忘身徇國。京又因其得罪。從而擠毀。是以七年之間。五害言者。凡所施行。得以自恣。遂使當時之所行。皆爲今日之所改。卞之尊紹。王氏知有安石。豈知有神考。知有金陵。豈知有京師。絕滅史學。一似王衍。重南輕北。分裂有萌。臣之痛心默憂。非一日也。陛下融會南北。去卞不疑。然而京尙未去。人實憂之。兄弟一心。皆爲國害。一去一留。失政刑矣。熙寧之末。王安石。呂惠卿。紛爭以後。天下之士。分爲兩黨。神宗患之。于是自安石旣退。惠卿旣出之後。不復用此兩人。而兩門之士。則皆兼取而並用之也。當時天下之士。初有王黨。呂黨。而朋黨之禍。終不及于朝廷者。用此術耳。自京卞用事以來。牢籠薦引。天下之士。處要路。得美官者。不下數百千人。其間才智藝能之士。可用之人。誠不爲少。若京去朝廷。則私門之士。數百千人者。皆爲朝廷之用矣。京在朝廷。則皆蔡氏之黨也。然則消黨之術。惟在去京而已。國家內外無事。一百四十年矣。至于保養陰邪。必成心腹之患。瓘又論哲宗實錄。不當止以蔡京兼修疏奏。上甚感其言。密賜瓘黃金百兩。〔案〕宋史瓘以上書明宣仁誣謗事。賜黃金百兩。后亦令勿遽去。界十僧牒爲行裝。改無爲軍。與此所載詳略互異。上謂輔臣曰。瓘言事極不可得。暫貶亦不久。前日遣人以金百兩賜之。瓘受賜。泣下布曰。陛下待遇如此。宜其感泣也。元符三年十月。京遂以翰林學士承旨。出知永興軍。至是除尙書左丞。京執政。凡二月而相。王黼上章乞骸骨曰。陛下用臣不爲不盡。任臣不爲不專。緣臣薄祜。取戾陰陽。內積憂虞。外傷疲弊。捫心自悼。弔影興嗟。獲戾天人。莫之可道。儻許盡還印綬。退卽里居。脫身于風波洶湧之中。收功于桑榆衰蹇。



之域。人非鬼責。少緩顛隳。永言此恩。是爲終惠。詔依所乞。守本官致仕。應得恩禮。朝謁人從等。並依蔡京例。仍給節度使俸。從優禮也。黼當國之久。專權稔惡。中外畏之。無敢言者。及是太上皇覺悟。罷其政事。天下稱快。

# 宋朝事實卷十一

## 儀注一

太祖乾德元年。將有事于南郊。爲壇于城南南薰門外。徑五丈。高九尺。四成。〔案〕四成。原本誤作四出。攷宋史禮志。壇舊制四成一成二十丈。再成十

五丈。三成十丈。四成五丈。成高八尺一寸。此書言徑五丈。指一成而言。徑爲五丈。則四圍爲二十丈。然不及宋史之詳。又高九尺。與宋史言八尺一寸者。不合。附註備攷。帝致齋于便殿。屏葦茹。前一日。上服袞

冕。備大駕鹵簿。宿齋于青城。上御青城門。觀奏嚴夜設警場。用鼓吹一千二百七十五人。奏嚴用金鉦。大角。大鼓。樂用大小橫吹。觶。篳篥。笛。角。手。歌六州。十二時。每更三奏之。

導引二首。和調玉燭。睿化著鴻明。緹管一陽生。郊禋盛禮燔柴畢。旋軫鳳皇城。森羅儀衛振華纓。載路溢歡聲。皇圖大業超前古。垂象泰階平。歲時豐衍九土樂。升平當寰海。澄清道高堯舜。垂衣治日月並文明。嘉禾甘露登歌薦。雲物煥祥經。兢兢夕惕持謙德。未許禪云亭。

六州。嚴夜警。銅史漏遲遲。清禁肅森。陛戟羽衛儼皇闈。角聲厲。鉦鼓收宜。金管成雅奏。逐次透迤。薦蒼璧。郊祀神祇。屬景運純熙。京坻豐衍。羣材樂育。諸侯述職。盛德服蠻夷。〔原註〕殊祥萃。九苞丹鳳來儀。爲和聲。

膏露降和氣。洽三秀。煥靈芝。鴻猷播史冊。相輝張四維。卜世永固不基。敷玄化。蕩蕩無爲。合堯舜文思。混并寰宇。休牛歸馬。咸偃革。蹈詠慶昌期。

十二時。承寶運。馴致隆平。鴻慶被寰瀛。時清俗阜。治定功成。遐邇詠由庚。儼郊祀文物聲明。天正星拱。

奉嚴蹕。布羽儀。簪纓宸心虔潔。明德播惟馨。動蒼冥。神降享精誠。〔原註〕燔柴半萬乘移。天仗肅鸞輅旋。

衡。千官雲擁。羣后輸誠。玉帛旅明庭。韶濩薦金奏。諧聲集休享。皇澤浹黎庶。普率洽恩榮。仰欽元后睿聖。

貫三靈。萬邦寧。景貺愈駢臻。

鹵簿使張昭又上言。準舊儀。鑾駕將出宮。入朝赴南郊宿齋之辰。皆有夜警晨嚴之制。奏嚴之設。本緣警備。事理與作樂全殊。況齋宿之夜。千乘萬騎。宿于儀仗之中。苟無鼓漏之徼巡。何警衆多之耳目。其宮門廟門。南郊夜警晨嚴之制。望依舊制施行。詔從之。

太祖乾德元年八月六日。太常禮院言。南郊壇衆星位版。并刻漏時辰。司天臺應奉豫申嚴辦。從之。太宗淳化四年五月三日。吏部侍郎陳恕言。郊壇祭祀。其神位席褥。望自今並委逐司長官封送祀所。禮畢。監祭使封還。從之。

太祖乾德元年。將有事于南郊。司天監新定從祀星辰圖。上之中書門下。詳定祀昊天上帝儀。設皇地祇之位。從祀五方五帝。日月五星。中官外官。總六百八十七位。

〔案〕原本五帝下脫日月二字。五星下脫中官外官四字。今據宋史禮志增入。

有司議請以

僖祖升配昊天上帝。太常少卿張昭請以宣祖崇配。詔從之。

〔案〕宋史禮志張昭議曰。隋唐以前。雖追立四廟。或六七廟。而無偏加帝號之文。梁陳南郊祀天皇。配以皇考。

北齊園丘祀昊天。以神武升配。隋祀昊天于園丘。以皇考配。唐貞觀初。以高祖配園丘。梁太祖郊天。以皇考烈祖配。恭惟宣祖皇帝。積累勳伐。肇基王業。伏請奉以配享。從之。此書不載其議。

乾德元年。將有事于南郊。禮儀使陶穀建議。取天文大角攝提列星之象。作攝提旗。及北斗旗。二十八宿旗。十二辰旗。龍墀十三旗。五方神旗。五方鳳旗。四瀆旗。于時有貢黃鸚鵡。白兔。及馴象。又作金鸚鵡。玉兔。馴象旗。帝又詔別造大黃龍負圖旗一。黃龍負圖旗一。

〔案〕宋史禮志。無黃龍負圖旗一六字。但以下二十一旗數之。則大黃龍負圖旗外。又有黃龍負圖旗。觀下文云。大黃龍負圖

旗。陳于明德門前。餘二十旗。悉立于宿頓宮。則此木二旗。而宋史刪去。可以證其闕。

大神旗六。日旗一月。月旗一。君王萬歲旗一。天下太平旗一。獅子旗二。金

鑾旗一。金鳳旗一。五龍旗五。二十一旗。皆有架。南郊用之。大黃龍負圖旗。陳于明德門前。餘二十旗。悉立于宿頓宮前。遇朝會冊禮。亦皆陳于殿庭。牙門旗。赤質錯采。爲神人象。中道前後各一門。左右道五門。門二旗。金節制。黑漆竿。上施圓盤。周綴紅絲拂。八層。黃繡龍袋籠之。幢制如節。而五層。韜以袋。繡四神。隨方色。朱漆柄。取曲禮。行前朱鳥。而後玄武。左青龍。而右白虎之義。絳麾如幢。止三層。紫羅囊蒙之。黃麾。古有黃朱纁三色。所以指麾也。漢鹵簿。有前黃麾。護駕御史。宋制。絳帛爲之。如幡。錯采成黃麾字。下繡交龍。朱漆竿。金龍首。上垂朱絲小蓋。幡本幟也。貌幡幡然。有告止傳教信幡。

〔案〕原本脫教字。今據宋史儀衛志增入。

皆絳帛錯采爲字。

上有朱絲小蓋。四角垂羅文佩。繫龍頭竿上。有錯采字下。告止為雙鳳。傳教為雙白虎。信幡為雙龍。又有絳引幡。制頗同。此作五色。聞暈無字。兩角垂佩。髦為四角小蓋。每角垂朱佩。間以朱絲。周綴五色帶。繡雲

龍。孔雀。白鵝。有三色之別。繫龍頭竿。竿制如戟。

〔案〕宋史儀衛志。豎本緝鳥毛為之。唐有六色孔雀。大小鵝毛。雞毛之制。後志云。今制有青。緋。皂。白。黃五色。上有朱蓋。下垂帶。帶繡禽羽。末綴金鈴。

青則繡以孔雀。五角蓋。緋則繡以鳳。六角蓋。皂則繡以鵝。六角蓋。白亦以鵝。四角蓋。黃則以雞。四角蓋。每角綴垂佩。揭以朱竿。上如戟。加橫木。龍首以繫之。與此書互有詳略。

王公所給幢。黑漆柄。紫綾袋。節。韜。以

碧玉。麾以紫綾袋。餘制同。范質與禮官議。

〔案〕宋史范質與禮官議郊祀輿服之制。在建隆四年。此書失載年月。

道駕官服袴褶之衣。按袴褶衣。其

制度所起。先儒皆無其說。惟開元雜禮。五品以上。通用細綾及羅。六品以下。服小綾褶衣。其色隨本品經

色。〔原註〕褶衣。即複衣也。

又按諸王朱綬。四采。赤。黃。縹。紺。赤。即朱也。以純朱為地。更次第輕入黃。白。青。汁。內染之。共為

四采。亦謂之朱褶。一品綠。縵。綬。四采。綠。紫。黃。赤。

〔原註〕縵。即綠也。是草之綠色。

以綠為地。亦謂之綠縵。綬。二品。三品。紫。綬。

三采。紫。黃。赤。謂之紫褶。其衣身領袖袂。請依今制。又按令文武弁。金飾。平巾幘。簪導。紫褶。白袴。玉梁。珠寶

鈿帶。鞞。騎馬服之。金飾。即金附蟬也。附蟬之數。一品九蟬。二品八蟬。三品七蟬。四品六蟬。五品五蟬。又令

文武弁。平巾幘。侍中。中書令。散騎常侍。加貂蟬。侍左者右珥。侍右者左珥。

〔案〕宋史輿服志。侍左者左珥。侍右者右珥。與此互異。

又開元

雜禮。導駕官。並朱衣冠履。依本品朱衣。今之朝服也。然自一品至三品。並用四入之朱為衣。乃協上下之

文異絳繒之色。又令文三品以上紫褶。五品以上緋褶。七品以上綠褶。九品以上碧褶。並白大口袴。起梁帶。烏皮鞋。看詳籠巾。籠冠。平巾。與武弁大冠。其名雖殊。本是一物。製同而飾別。蓋以官品爲差。其幘戴在籠冠下。今請造袴褶。如今制。其起梁帶形制。檢尋未獲。欲乞以革帶代之。奏可。又令博士檢緋紫柄襠制度。按開元禮。武臣陪位。大仗加蟻蛇柄襠。如袖無身。以覆其膊。胛。〔原註〕胛音各。蓋按。下縫也。從肩領覆臂膊。共一尺二

寸。又按釋文玉篇云。其一當胸。其一當背。謂之兩當。今詳柄襠之制。其領連所覆膊。其一當左膊。其一當右膊。故謂之起膊。今請兼存兩說。擇而用之。是歲造柄襠。遂用當胸背之制。

乾德元年。將有事于南郊。于是范質上言。三公祭服。舊皆畫升龍。請令禮官檢尋故事。按三禮。三公毳冕。無龍章。上公袞冕。二品鷩冕。又周禮。言上公袞冕九旒。以五采繩。貫五采珠。旒長九寸。每寸以珠玉瑱。其衣玄色。五章。山龍。華蟲。火宗。彝。畫于衣。其裳朱色。四章。藻。粉。米。黼。黻。繡于裳。又按令文。旒並貫青色珠。青纊。其珠及充纊。今請依令文。青色之制。詔從之。遂改製焉。

淳化四年正月辛卯。合祭天地圜丘。以宣祖太祖皇帝同配。有司因請孟春祈穀。孟冬神州地祇。季秋大饗明堂。請以宣祖配。冬至祀昊天。夏至祀皇地祇。孟夏雩祀。請以太祖配。從之。

〔案〕宋史。淳化四年。以宣祖太祖並配圜丘。禮儀使蘇易簡。請郊祀。

圜丘奉宣祖。太祖同配。其常祀祈穀。神州地祇。明堂。以宣祖配。圜丘。北郊雩祀。以太祖配。奏可。此以下三條從事實類苑探出。而字句多訛。缺復據宋史訂正。

太宗將南郊。彗星見。宰相趙普召檢討杜鎬問之。鎬曰。當祭日。食猶廢祭。鎬見如此。罷祀不疑。遂從其說。至熙寧五年。將郊而河決。神宗問輔臣曰。議者以河決地震不當郊。王安石曰。古者年不順成。八蜡不通。八蜡小祭。或可以變異廢。上帝之祭。乃祭之大者。恐不宜如此。上亦以爲然。

建隆四年。太常博士和峴奏。唐以前寅日蜡百神。卯日祭社宮。辰日臘饗宗廟。開元定禮。三祭皆于臘辰。以應上德。聖朝火德。合以戌日爲臘。而以前七日辛卯。便行蜡禮。恐未爲宜。下太常議。而請蜡百神。祀社。饗宗廟。同用戌臘日。〔案〕以上各條皆郊祀之儀。此係蜡臘擇日。故以類從。不復以時代爲先後。

仁宗慶歷四年十月壬辰。太常禮院言。新修禮儀。並據通禮。而郊廟舊儀。所設罇壘之數。乃與通禮不同。南郊配帝位。舊誤著罇二。山壘二。今宜如通禮。犧罇之次。益以象罇二。其下壇午階之東。舊設象罇二。壘二。山壘二。今宜如通禮。增山壘爲四。每太廟室。舊設罍彝一。黃彝著尊二。今宜如通禮。用罍彝一。黃彝一。犧罇一。象罇二。山壘二。仍于堂下階間。及設壺罇二。山壘二。從之。仁宗景祐二年十一月十一日。詔訪聞祀天地社稷宗廟。簠簋籩豆祭器。多是損壞。收掌不得嚴潔。令太常禮院相度修整。不堪者。別引創造。淨潔處。置庫收盛。

封禪。帝每道經險峻。必降輦徒步。所司議增侍衛。皆卻之。導從者。或至疲頓。而帝辭氣益壯。侍臣莫不瞻悚。至回馬嶺。以天門斗絕。給從官橫板。選親從卒。推引而上。〔原註〕板之制。長三尺許。兩端施綵帛。上則施于背。下則施于臄。衛士皆給釘。

鞞。上至御幄。命近臣觀玉女泉及古碑前。一夕山上大風裂帟幕。遲明未已。及上之至。天氣溫和。纖羅不動。祥光瑞雲。交相輝映。辛亥。設昊天上帝位于山上圓臺。太祖太宗配帝位于東方。西向。北上側向。以申祖宗恭事之意。設五方帝。日月。天皇大帝。北極神座。于山下。封祀壇之第一等。青帝于卯陞之北。赤帝于午陞之東。黃帝于午陞之西。白帝于酉陞之南。黑帝于子陞之西。大明于卯陞之南。夜明于酉陞之北。天皇大帝于戌陞之北。北極于丑陞之東。席皆以藁秸。上加席褥。設五星。十二辰。河漢。及內官。五十四座。于第十有二陞之間。各依方面。几席皆內向。其內官北斗于未陞之東。天一太一。皆在北斗之東。五帝內座。在亥陞之西。帝座在卯陞之北。又設二十八宿。及中宮。一百五十八座。于第三等。其二十八宿。及大角。攝提。太微。太子。明堂。軒轅。三台。五車。諸王。月星。織女。建星。天紀等。一十六座。並差在外位前。又設外官一百六座。席位于內壇之內。又設衆星三百六十座。席位于內壇之外。各依方次。十有二陞之間。席皆以莞。所司陳寶。及嘉瑞等。于樂縣之北。東西廂。玉。昊天上帝。以蒼璧。青帝。以青珪。赤帝。以赤璋。白帝。以白琥。黑帝。以玄璜。黃帝。以黃琮。日月。以珪璧幣。昊天上帝幣。以蒼。地祇幣。以黃。配帝幣。以白。五天帝。日月內官以下。各從其方之色。各長一丈八尺。又方丘玉幣。皇地祇。以黃琮。其幣。以黃。神州。以兩珪。有邸。其幣。以玄。配帝之幣。以白。封祀壇內官。五十四座。中官。一百五十八座。外官。一百六座。社壇。嶽鎮海濱以下。一十八座。依南郊隨方色用幣。正位。配位。依南郊。各位。犢一。羊一。豕一。五方帝。每位。羊一。豕一。日月神州。每位。羊一。豕一。



二從祀七百三十七位。羊豕每位使肉二段。計使一千四百七十四段。上服袞冕。侍中奏中嚴。少頃。又奏殿中監進鎮圭。皇帝出次。盡屏導衛。減去拂翟。燭籠前導亦徹去。上至幄殿。登歌樂作。用高安之曲。禮儀使引皇帝就褥位。西向樂止。禮儀使奏請皇帝再拜。拜訖。禮生贊拜。在位羣臣皆再拜。次禮儀使引皇帝詣盥洗。樂作。侍中跪取匱盥沃水。皇帝搢圭。盥手。門下侍郎進帨巾。皇帝帨手訖。樂作。解劍。脫烏如常儀。禮儀使贊引皇帝升幄殿。樂作。降神。用禮安之曲。皇帝自午陞升。詣昊天上帝正座前。禮儀使奏請皇帝再拜。上香。進酒。貢幣。俯伏興。再拜。中書侍郎讀玉冊。維大中祥符元年。歲次戊申。十月。戊子。二十四日。辛亥。嗣天子臣德昌敢昭告于昊天上帝。臣嗣膺景命。昭事玄穹。昔太祖揖讓興邦。〔案〕興邦。宋史禮志作開基。太宗憂勤。

致治。肅清寰海。

〔案〕肅清。宋史作廓清。

混一車書。升中告成。猥延積慶。

〔案〕此二句。宋史作同抑升中。以延積慶。

元符錫祚。衆寶效祥。異域咸懷。

豐年屢應。虔修封祀。祈福黎元。謹以玉帛犧牲。粢盛庶品。備茲禋燎。式薦至誠。皇伯考太祖皇帝。啓運立

極。英武聖文神德玄功大孝皇帝。皇考太宗至仁應道神功聖德文武大明廣孝皇帝。配神作主。尙饗。次

詣太祖皇帝配座前行禮。玉冊文。

〔案〕太祖太宗玉冊文。宋史禮志並失載。此足補其闕。

維大中祥符元年。歲次戊申。十月。戊子朔。二十

四日辛亥。孝子嗣皇帝臣德昌敢昭告于皇伯考太祖啓運立極英武聖文神德玄功大孝皇帝。恭以在

昔昊穹顧懷。聖神開統。救衰五代。先德後刑。平亂四方。有征無戰。荆湘請覲。巴蜀知歸。海隅既同。江左亦服。臣猥以孱眇。祇荷慶靈。再炳元符。誕彰休應。封祀喬嶽。陟配上玄。虔舉典章。敢祈昭格。謹以制幣犧牲。粢盛庶品。式伸嚴配。侑神作主。尙饗。次詣太宗皇帝配座前行禮。玉册文。維大中祥符元年。歲次戊申。十月戊子朔二十四日辛亥。孝子嗣皇帝臣德昌。敢昭告于皇考太宗至仁應道神功聖德文武大明廣孝皇帝。恭以欽明御宇。玄德應天。撫泉浙之強雄。除并汾之負固。誕敷景化。聿致太平。儀抑升中。功遵不宰。臣猥承積慶。獲荷鴻休。時臻太和。屢惟稔歲。大錫遐祚。再炳元符。紀號名山。永揚徽烈。謹以制幣犧牲。粢盛庶品。式伸嚴配。侑神作主。尙饗。封祀玉牒文。維大中祥符元年。歲次戊申。十月戊子朔二十四日辛亥。有宋嗣天子臣德昌。敢昭告于昊天上帝。運啓大同。惟宋受命。太祖開階。〔案〕開階。宋史作肇基。功成治定。太宗膺圖。

重熙累盛。粵惟沖人。丕承列聖。〔案〕宋史此句下有實恭奉天憂勤聽政二語。一紀于茲。四隩來暨。玄貺殊尤。元符章示。〔案〕宋史此句下有諸慶發祥。

清淨可致二語。時和年豐。羣生咸遂。〔案〕宋史此句下有仰荷顧懷。敢忘繼志二語。僉議大封。聿伸昭事。躬陟喬嶽。對越上玄。〔案〕宋史此句下有率禮祇廟。備物吉蠲。

以仁守位。以孝奉先等語。祈福下民。侑神奉先。天祿無疆。靈休允迪。萬葉其昌。永保純錫。禮儀使贊。引皇帝復褥位。亞獻終獻。行事宰臣以下。分祀羣神。訖。皇帝飲福酒。攝中書令王旦跪稱。天賜皇帝。太元神策。周而復始。永綏

兆民送神。上詣昊天上帝座前。封玉匱。太祖太宗座前。封金匱。還立石礮南。攝太尉王旦奉玉匱于礮中。有司徹饌。燔燎。將作監率工人封石礮。畢。禮儀使跪奏。禮畢。前導皇帝歸幄殿。佩劍。納鳥樂。作殿中監跪受鎮圭。皇帝至御幄。樂止。司天跪奏。慶雲繞壇。月有黃輝。氣宰臣率從官稱賀。卽日還仗奉高宮。壬子禪祭社首山。如封祀之禮。禪祭皇地祇。玉冊文。維大中祥符元年歲次戊申十月戊子朔二十五日壬子。嗣天子臣德昌敢昭告于皇地祇。無私垂祐。有宋肇基。命惟天啓。慶賴坤儀。太祖神武。威震萬寓。太宗聖文。德綏九土。臣恭膺寶命。纘承丕緒。穹昊降祥。靈符下付。景祚延鴻。祕文昭著。八表以寧。五兵不試。九穀豐穰。百姓親比。方輿所資。涼德是愧。溥率同詞。縉紳叶議。因以時巡。亦旣肆類。躬陳典禮。祇事厚載。致孝祖宗。潔誠嚴配。以伸大報。聿修明祀。本支百世。黎元受祉。謹以玉帛犧牲。粢盛庶品。備茲禋祀。式表至誠。皇伯考太祖啓運立極。英武聖文神德玄功大孝皇帝。皇考太宗至仁應道神功聖德文武大明廣孝皇帝。配神作主。尙饗。上至山下。服靴袍。步出大次。侍臣言山路險滑。請乘步輦。上曰。接神在邇。敢不徒行。前夕陰晦。風勢勁猛。不能燃燭。及行事。風頓止。天寓澄霽。燭燄凝然不動。封石礮訖。紫氣蒙壇。法駕還奉高宮。日重輪。五色雲見。鼓吹振作。觀者塞路。萬歲之聲。震動山谷。配座金匱。迴日奉置太廟本室。上作登泰山。謝天地。述二聖功德銘。初王欽若言。唐高宗玄宗二碑之東。石壁南丘平峭。欲卽崖成碑。以勒聖製。上曰。朕之功德。故無所紀。若須撰述。不過謝上天敷佑。敘祖宗盛美。是日幸仁聖天齊王炳靈公廟。岱嶽觀。王

母池宜福寺青帝君觀天賜殿靈液亭改上泰山奉高宮曰會真宮增葺室宇選道士住持焚修仍給供奉國朝以來天下所獻珍禽奇獸悉縱于山下具物。

癸丑御朝觀壇肆赦

〔案〕此敕文東都事略及長編宋史俱失載

門下式觀邃古眇覲前王功成治定之餘時和歲豐之際三靈孚

佑萬寓宅心則攷登封降禪之文率建顯垂鴻之禮無懷而下間封祀于崇巒開元以來曠講求于徽典時更五代運應千年當聖祖之開基肇平郊壘暨神宗之制作益固邦基升喬嶽以未遑謂冲人之克嗣肆予纂紹每務精勤動經畫于永圖庶奉承于先志顧惟寡德素昧王猷遵奕世之貽謀承慶靈之遠及屬以五兵銷假四海澄清良民合歸厚之風嘉穀茂重華之歲荷洪符之昭錫示大歷以無疆允叶昌期實繁靈眷威蕤絕瑞覺倍輿情是用承列聖之垂休徇衆臣之勤請聿崇大報躬造神區文物聲明具陳于法駕豆籩珪幣悉奉于彝章紫壇仲嚴配之儀玉檢視封崇之制諒三神之降鑒伊百福以潛臻輯瑞班朝率從肆覲省方問俗用慰來蘇遵王度以無愆展國容而有耀既被紛紛之景覲宜覃渙汗之洪恩冀與羣生共膺遐嘏可大赦天下云云於戲升中展采曠古之盛儀尊祖配天哲王之洪範既周旋而集事諒中外以咸歡載省眇躬獲成大禮猥當殊慶愈勵深衷思廣聽于嘉謀貴同裨于闕政更賴朝廷勳舊藩輔親賢逮諸文武之臣共立忠勤之效式扶昌運永保丕休

是日上有黃氣如匹素五色雲如蓋紫氣翊仗是夕次中牟縣辛丑過訾村設幄殿奉置三陵神主上鞞

袍拜哭奠獻。是夕晴霽。始就次。蒼煙白露。赴陵上。俄覆神幄。禮畢。乃散。咸以爲上哀慘所感。

〔案〕此以下爲真宗大中祥符

四年二月辛酉。京祀汾陰后土之

儀。原本不載年月。今依宋史序訂。

是日帝召近臣登延慶亭。南望仙掌。北瞰龍門。自宮至雎上。列植嘉樹。六師環宿行闕。旌旗沓幕。照耀郊次。帝眺覽久之。

先是雎上多風。及行禮頓止。黃氣遶壇。月重輪。衆星不見。惟大角光明。

上登鄴丘亭。視汾河望梁。顧左右曰。此漢武帝泛樓船處也。一時之樂。垂于千古。卽日還奉祇宮。鼓吹振作。紫氣四塞。觀者溢路。民有扶老攜幼。不遠千里而至者。咸感泣言曰。五代以來。此地爲戰場。今乃獲覩天子巡祭。實千載一時之幸。

赦文門下。爲人倫之紀律。禮曰天經。著王者之誠明。祀惟大事。凡致恭于禱。載求介福于黎元。已建園封。是崇方澤。攷乾元之設象。配乾健以同符。厚德無疆。柔祇定位。矧高雎之靈境。有前古之嚴祠。誕集祺祥。薦從禋瘞。登隆祭典。焜燿國容。歷五運以下衰。曠六飛之戾止。顧予菲德。叨纂慶基。欽燕翼之貽謀。荷豐融之敷祐。旣無文而成秩。顧墜典以交修。多愧眇冲。獲遵盛美。率由勤請。勉徇輿情。慰蒲津佇望之民。奉鄴上親祠之事。百神幽贊。九服駿奔。嘉瑞必升。靈休允答。遂涓良日。式展鴻儀。務極洗心。以申精意。薦豆

籩而惟潔奠琮帛以斯嚴禮樂相資神祇肯悅集顧懷之殊貺契茂育之玄功是用周覽時風肆覲西后輯瑞圭而成列羅琛貢以充庭和氣沖融頌聲洋溢肇迎嘉慶適鍾神賜之祥均被華夷宜廣雲行之施可大赦天下云云於戲龐洪之慶旣浹于八區眷佑之靈普臻于兆庶更賴宗親勳舊文武忠良罄同德之端誠贊卜年之景祚庶期寰宇永洽純熙是行塗中屢有甘澤之應皆夕降晨霽從官衛兵無沾濡之患又農事方興耕民懽抃相屬

三月駐蹕西京陳堯叟李宗諤來朝堯叟奏曰臣等供使職日面奉宸旨今之祀事皆爲蒸民如不擾人集事卽副朕意臣等自經度訖于禮成凡土木工三百九十萬餘止役軍士至于輦送芻糧供億頓置亦未嘗科率編民上稱善久之始雍熙初議封禪特命翰林學士扈蒙宋白賈黃中右散騎常侍徐鉉兵部員外郎張洎太常丞呂端殿中丞韓瑄詳定儀注真宗東封命翰林學士杜鎬待制陳彭年與禮官同撰儀注至是祀汾陰亦如之



# 宋朝事實卷十二

## 儀注二

國初因唐與五代之制。文武官每日赴文明殿。〔原註〕即文德殿。正衙常參。宰相一人押班。五日起居。即崇德長春

二殿。〔原註〕崇德即紫宸。長春即垂拱。中書門下爲班首。其長春殿常朝。則內侍省都知押班。率內供奉官以下。并寄班等

先起居。次客省閣門使以下。〔原註〕呈進目者。次三班使臣。〔原註〕節度觀察防禦團練刺史等子弟。充供奉官侍禁殿直有旨令預內朝起居者。次內殿當直諸班。

〔原註〕殿前指揮使。左右班都虞候。內殿直散員散指揮散都頭。金鎗班等。次長入祗候東西班殿侍。次御前忠佐。次殿前都指揮使。率軍校。至副指

揮。次駙馬都尉。〔原註〕任刺史以上者。緩本班。次諸王府僚。次殿前都軍使都頭。次皇親將軍以下。至殿直。次行門指揮使

率行門起居。〔原註〕以上並內侍贊喝。如傳宣。前殿不坐。即宰相樞密使。文明殿學士。三司使。翰林樞密直學士。中書舍

人。三司副使。知起居注。皇城內監庫藏朝宮諸司使。副內殿崇班供奉官。侍禁殿直。翰林醫官待詔等。同



班入。次親王。次侍衛親軍馬步軍都指揮使。率軍校。至副都指揮使。次使相。次節度使。次統軍。次兩使留後觀察使。次防禦團練使。刺史。次侍衛馬軍步軍使都頭。起居畢。見謝班入。如御崇德殿。卽樞密使以下。先就班。俟升坐。〔原註〕諸司使副以下。至殿直分東西對立。餘皆北向。宰相參知政事。最後入。〔原註〕以上並閣門贊喝。日止再拜。朔望及三日假。卽樞密使以下。皆舞蹈。

建隆三年三月。重定合班儀。升六曹侍郎。在給事舍人之上。郎中在補闕之上。員外郎在拾遺之上。節使在六曹侍郎之上。中書侍郎之下。故事。京兆省官爲侍從班。五品押南省。四品。六品押南省。五品。節使在

諸司三品之下。至是改焉。〔案〕文獻通攷載合班圖。于朝儀後。可與此互證。十月。賜文武常參官冬服。累朝止。賜將相翰林學士。諸軍

大使。至是太祖曰。冬服不及百官。甚無謂也。故賜之。

乾德元年閏十二月。詔一品致仕官。曾帶同平章事者。每遇朝會。宜綴中書門下班。是時太子太師致仕侯益等來陪祀。故有是詔。

淳化二年十二月。太宗御文德殿。羣臣入閣。禮畢。賜百官廊下殮。唐制。朔望天子御宣政殿。受百官起居。諸司奏事。仗衛如式。敬宗始于紫宸。爲入閣之儀。五代以來。禮容多闕。至是始復舊。

三年正月。太宗御朝元殿。受賀禮畢。改服通天冠。絳紗袍。升殿。羣臣上壽。國朝以來。元正冬至朝賀。御正

殿即以退御大明殿羣臣常服上壽奏教坊樂至是始約開元禮皆以法服設宮懸萬舞酒三行而罷大宴羣臣于廣德殿分設宰相使相三師三公參知政事東宮三師僕射學士御史大夫中丞三少尚書常侍賓客太常宗正卿丞郎給事諫舍節度兩使留後觀察防禦團練刺史上將軍都指揮使坐于殿上文武四品以上知雜御史郎中郎將禁軍都虞候坐于朵殿餘升朝官諸軍頭都頭以上諸蕃進奉使諸道進奉軍將以上分坐于兩廊宰相使相坐以繡墩〔原註〕曲宴行幸用杌子參知政事以下用二蒲墩花毯〔原註〕曲宴樞密使副使

並同〔案〕花毯宋史禮志作蜀毯

軍都指揮使以上用一蒲墩自朵殿而下皆緋緣氎條席殿上器用金餘以銀其日樞密

使以下先起居訖當侍立者升殿宰相率百官入宣徽閣門通唱致詞訖宰相升殿進酒各就坐酒九行每上舉酒羣臣立侍次宰相次百官舉酒或傳旨命酌即皆搢笏起飲再拜〔原註〕曲宴多令不拜或上壽朝會止令

滿酌不勸中飲更衣賜花有差宴訖舞蹈拜謝而出太平興國後止設春宴雍熙三年後常以暮春召近臣賞花釣魚于苑中三館之職皆預淳化四年令京官兼館職者並預大宴咸平三年始備設春秋大宴五年十二月詔凡內宴宗正卿令升殿坐班次依合班儀又以翰林學士梁灝請春秋大宴小宴賞花行幸次爲四圖頒下閣門遵守〔案〕宋史禮志春秋季仲及聖節郊祀藉田禮畢巡幸還京凡國有大慶皆大宴天聖後大宴率于集英殿次宴紫宸殿小宴垂拱殿若特旨則不拘常制天禧四年從

集賢院祖士衡言大宴將更衣羣臣下殿然後更衣更衣後再坐則羣臣班于殿庭候上升坐起居謝賜

花再拜升殿

〔案〕文獻通攷有大慶殿再坐上壽立班圖

初入面西躬候通銜位姓名訖引當殿贊喝兩拜搢笏舞蹈三拜不起奏聖躬萬福喏贊又再拜喝祇候出如喝有勅賜酒食更兩拜搢笏舞蹈三拜訖祇候差遣見引當殿立躬喝兩拜隨拜山呼奏聖躬萬福喏喝祇候平身立俟喝謝恩兩拜隨拜山呼

〔案〕此條不著某年所定某處儀注與文獻通攷宋史禮志所載常朝起居入閣賜宴諸儀互有異同疑原本尙詳傳寫闕之

唐王及善曰中書令可一日不見天子乎太祖開寶九年以中外無事始詔旬假日不坐然其日輔臣猶對于後殿問聖體而退至道三年三月二十九日旬假是日太宗猶對輔臣至夕帝崩李南陽永熙挽詞曰朝憑玉几言猶在夜啓金縢事已非時稱佳作至真宗朝旬假輔臣始不入寶元中西事方興假日視事慶歷初乃如舊

諸蕃入朝皇朝之制西北蕃部及契丹高麗東南蠻西南夷及諸外蕃國來貢者並對于崇德殿契丹使捧書函入殿庭北向鞠躬閣門使降受升殿以進內侍都知受而啓之通事舍人導使者升殿代其主跪問聖躬上令內侍都知報問之皆通事傳譯畢乃降階西向通名起居舞蹈賜冠帶器幣鞶勒馬上親宴其使于內殿他國使或止就長春殿皆于殿庭北向跪奉表函通事舍人受以進南蠻東夷西南夷海外

國西北蕃部對訖復引對于崇政殿

〔案〕宋史禮志凡外國使至及君長來朝皆宴于內殿開寶八年宴契丹使于長春殿太平興國三年宴契丹使諸國蕃客于崇德殿以契丹使來賀故也景德澶淵會盟以

來始定儀注引對于崇德殿宴使于長春殿至政和五禮新儀則朝見賜宴朝辭皆于紫宸殿假日皆于崇政殿諸國不及也此書所載蓋據宋初之制

有善本國歌舞者令奏之契丹高麗交阯使

歸赴內朝奉辭皆于崇德殿其契丹使召升殿授書他國書皆有司付之其賜物有差真宗景德後契丹

請盟每使至遣官爲接伴館伴使副使舍于都亭驛班在上將軍之下宴賜加等餘蕃使分館諸驛高麗

使至遣閣門祗候接送直館一員館伴宴餞亦命近臣諸蕃夷奉朝貢四十三國

〔原註〕契丹夏州歲遣使入貢已載本門高麗

國〔原註〕漢玄菟郡國境南北一千五百里東西三千里

定安〔原註〕馬韓之種爲契丹所攻餘衆保于西

女真〔原註〕渤海之別種本駕姓

日本〔原註〕倭奴國也以近日所出故改稱

交阯〔原註〕本南越之地交州總管也後改安南都護府

溪洞諸蠻〔原註〕隋置辰州唐置錦州巫州欽州皆唐末蠻酋分據其地自置僞刺史建隆以後溪洞諸蠻皆歸順乞內附朝廷悉命其酋長爲刺史

南丹州〔原註〕溪洞別

種與宜撫水州〔原註〕在宜州南有縣四曰撫水曰京水曰多逢曰古勞唐隸黔南

西南蕃〔原註〕漢牂牁郡唐置費珍莊瑛播郎牂夷等州

邛部州蠻〔原註〕漢越嶲郡由黎州十一程至部落

黎州山

前山後蠻〔原註〕西南夷之別種其酋長號都鬼主黎州南行七日至其地又一程至瀾州又二程至建昌又千里至雲南

雅州蠻〔原註〕西南夷別種

風琶蠻〔原註〕在建昌城之上

占城〔原註〕在中國西南北至

廣州傾風半月程至兩浙一月程

三佛齊〔原註〕南蠻之別種與占城爲鄰

閩婆〔原註〕國在南海中

勃泥〔原註〕在中國之西南大海中

注輦〔原註〕其國水行至廣州約四十一萬一千四百里

蒲端〔原註〕國在海

上與占〔原註〕國在海上。水路東丹流眉〔原註〕舊名身毒。赤白天竺〔原註〕舊名身毒。赤白大食〔原註〕本波斯之別種。于闐〔原註〕國在京師之西。九千九百餘里。西南帶葱嶺與婆羅門接。相

去三千餘里。東接吐蕃。〔原註〕回高昌〔原註〕漢車師前王之地。其國有高昌回鶻〔原註〕匈奴之別裔。國在西北。婆羅西北至疏勒二千餘里。〔原註〕回鶻之別種。高昌〔原註〕漢車師前王之地。其國有高昌回鶻〔原註〕匈奴之別裔。國在西北。婆羅吐

蕃。〔原註〕本漢西戎之地。或云南涼禿髮利鹿孤後。以禿髮党項〔原註〕古析支之地。漢西羌之別種。西涼府〔原註〕西涼。即涼為國號。語訛吐蕃。族帳分處。各有首領。內屬者為熟戶。

之地。雖為吐蕃所隔。然其地亦自置牧守。沙州〔原註〕瓜沙二州。達靺〔原註〕東方靺鞨之東至靈武千里。西北去至甘州五百里。〔原註〕瓜沙二州。達靺〔原註〕東方靺鞨之別部音訛謂之達靺。

會州刺史。層檀〔原註〕國與占勿巡〔原註〕南海上小國。大中祥符中。伊州〔案〕原本闕註。龜元英文賓同隴〔原註〕海南小庶稅。至道中來。甘州〔原註〕甘州回鶻可西州〔案〕自此以下五國。原本俱闕註。文昌雜錄謂西州大食〔案〕文昌朝貢。今不具到。汪舊隸沙州歸義軍。本高昌國。漢車師前王之地。貞觀中。平其地為西州。

羅離宋史大食國傳。大食〔案〕文昌雜錄誤以俞盧和地為南荒之國。攷宋史謂大食國人入貢。路由沙州。涉夏國。抵秦作陀婆離俱無慈字。

陀婆離有俞盧和地。有麻囉跋等國。然大理國〔案〕范成大桂海虞衡志曰。大理南詔國也。本唐小夷。自皮邏諾併五詔為一。受冊封皆冠以大食。則其為西方之國無疑。

字異。未詳所始。西天大食國〔案〕文獻通攷宋史俱不著西天之稱。惟于熙寧六年。載都蕃首蒲陀婆離慈

表奉貢物事。據此書後篇所記。是年西天大食國來朝。疑係一事。附註備攷。

日本淳化二年貢方物。太平興國九年獻銅鈴磬。景德元年來朝。大中祥符二年來朝。熙寧五年來朝。元豐元年來朝。

交趾開寶元年八月來貢方物。太平興國二年五年七年八年來貢方物。雍熙二年貢方物。三年貢金器牙犀。端拱元年貢方物。淳化元年貢龍鳳椅子傘握子。五年貢方物。至道三年貢七寶交椅方物。咸平元年獻馴象。四年貢馴犀象。景德元年遣其子明提來貢。四年遣其弟明昶來貢。乞賜九經佛經。大中祥符二年貢馴犀。三年五年七年貢方物。天禧三年遣弟鶴來貢方物。熙寧二年六年貢方物。元豐元年貢方物。

溪洞諸蠻逐年同天節端午貢方物。

南丹州開寶七年貢銀器馬。九年求賜牌印。太平興國五年貢銀。淳化元年遣其子來貢銀。五年貢方物。撫水州咸平四年正月貢方物。三年十一月十二月又來朝。天禧元年貢方物。

西南蕃乾德四年五年六年貢方物。開寶二年貢方物。八年貢馬。太平興國三年貢方物。五年貢馬。雍熙二年八年貢方物。九年貢馬。淳化元年遣其弟漢興來朝。三年貢方物。馬。至道元年貢方物。咸平元年貢方物。二年五年貢馬。景德元年貢方物。大中祥符二年貢賀東封馬。六年八年九年貢方物。天禧四年貢方物。天聖四年貢方物。康定元年貢馬。熙寧三年貢方物。六年四次貢方物。十年貢方物。

邛部州蠻開寶二年貢方物。太平興國四年貢方物。雍熙二年貢馬。端拱二年貢御馬。淳化二年貢方物。馬。至道三年遣其子來朝賀。咸平二年五年貢方物。景德二年貢象牙。大中祥符元年貢馬。景祐五年貢方物。

黎州山前山後兩林蠻開寶二年八年貢方物。太平興國二年四年貢馬。雍熙二年貢方物。端拱二年貢馬。淳化元年貢方物。大中祥符元年貢方物。天禧二年貢方物。

雅州蠻太平興國二年貢方物。大中祥符二年貢馬。犍牛三年貢方物。馬。

風琴蠻咸平元年貢馬。景德二年貢犀角。犍牛青羊。

占城建隆元年貢方物。二年來朝。三年貢方物。乾德四年三月九月貢方物。五年貢方物。開寶二年貢馴象牙。四年貢方物。六年四月貢方物。七年九月貢方物。太平興國二年三年四年七年貢方物。八年貢馴象。淳化元年貢馴犀。三年貢方物。至道元年三年貢方物。咸平二年來朝。景德元年二年四年貢方物。大中祥符元年三年四年七年八年二月五月貢方物。天禧二年貢方物。天聖八年貢方物。熙寧元年九月貢方物。元豐元年貢方物。

三佛齊建隆元年二年三年三月十一月貢方物。開寶四年五年貢方物。七年貢象牙。八年貢方物。太平興國五年八年貢方物。雍熙二年貢方物。端拱二年貢方物。淳化元年貢方物。咸平六年貢方物。大中祥

符元年貢方物。天禧元年貢方物。天聖六年貢方物。

闍婆。淳化三年貢方物。

勃泥。太平興國二年貢方物。

注輦。大中祥符八年貢方物。天禧四年貢方物。明道二年貢真珠等。熙寧十年貢方物。

蒲端。咸平六年貢方物。景德元年四年貢方物。大中祥符四年貢方物。

丹流眉。咸平四年貢方物。

天竺。乾德三年貢舍利。開寶五年貢舍利。八年貢方物。太平興國三年貢舍利。五年貢香藥。七年貢佛頂印。八年貢經。犀角。淳化二年貢舍利。至道元年貢佛頂骨。三年貢梵夾。咸平元年四月來朝。二年貢梵夾。四年四月來朝。七月貢梵夾。舍利。六年貢方物。景德元年貢舍利。二年貢梵夾。菩提葉。大中祥符三年貢金剛坐。四年正月貢金剛坐。六年貢梵夾。經。佛骨。舍利。七年貢梵經。九年二月貢佛骨。舍利。四月五月來朝。天禧三年四年貢梵經。天聖二年貢梵經。

大食。開寶元年四年六年七年八年九年貢方物。太平興國二年四年貢方物。雍熙元年貢花錦。淳化五年貢方物。至道元年貢龍腦。三年貢方物。咸平二年閏三月六月三年六年貢方物。景德元年二年四年貢方物。大中祥符元年貢玉圭。九年貢方物。天禧三年貢方物。熙寧三年貢方物。



于闐建隆二年貢玉圭。乾德三年來朝。四年遣其子德從來朝。貢方物。大中祥符二年貢方物。天聖二年貢玉圭。玉帶。方物。嘉祐八年貢方物。熙寧四年六年十年貢方物。元豐元年貢方物。

龜茲太平興國九年貢方物。咸平四年貢玉馬。六月十一日貢方物。景德元年五月六月貢方物。大中祥符三年貢乳香。六年貢方物。天禧元年貢玉馬香藥。四年貢大尾白羊。天聖二年貢橐駝馬。玉。三年七年九年貢方物。景祐四年貢方物。熙寧五年貢方物。

高昌建隆三年貢方物。乾德三年貢佛牙琉璃器。太平興國六年八年九年貢方物。景德元年貢玉馬等。回鶻建隆二年三年貢方物。乾德二年貢方物。三年四月貢馬。駝。十二月貢馬。玉。開寶三年貢駝馬。太平興國五年貢方物。雍熙四年貢鑰石。至道二年貢方物。咸平元年三年貢方物。景德元年九月貢方物。閏九月貢戰馬。四年貢方物。大中祥符元年四月來朝。三年四年貢方物。五年五月八月貢寶貨橐駝馬。六年貢御馬。八年十一月貢方物。九年十二月貢馬。玉。天禧二年四年三月十二月貢方物。天聖元年二年三年貢方物。馬。熙寧七年貢方物。

吐蕃建隆二年貢橐駝馬。三年獻伏羌地。太平興國八年貢馬。九年貢羊馬。淳化二年獻山林田畝。五年貢馬。咸平三年貢犛牛。六年貢馬。景德元年貢馬。又三月來朝。三年貢方物。大中祥符元年三年五年貢馬。八年二月貢馬。十月貢方物。九年三月貢馬。四月來朝。天聖二年貢馬。

党項建隆二年來朝淳化四年三月十二月來貢馬五年遣其子朝貢至道三年貢馬咸平元年三月十月來朝七月貢馬二年來朝貢四年貢馬五年四月十二月來朝貢六年貢馬景德二年貢馬三年貢方物大中祥符二年四月貢方物

西涼府淳化二年貢方物五年貢馬至道元年二年貢馬咸平元年貢馬二千匹五年貢馬五千匹十二月貢方物六年四月貢方物八月貢馬景德元年貢六谷馬三千匹二年四月貢馬三年五月貢方物六月十二月又貢馬四年五月來朝十二月貢方物大中祥符元年貢馬二年二月貢方物十一月貢馬四年三月十月貢方物五年其子來貢馬七年四月十一月貢方物八年五月十月貢馬來朝天聖四年貢馬

沙州建隆二年貢玉鞍太平興國五年三月貢玉圭八年貢方物淳化二年貢良玉舍利至道元年三月五月貢方物咸平二年貢玉團五年貢方物景德元年貢玉馬四年貢玉印天聖元年貢乳香皇祐三年貢方物

達靺乾德四年貢方物開寶二年貢方物太平興國六年八年貢方物

置勒斯賚大中祥符八年九年來貢馬天禧三年貢馬景祐四年貢方物寶元二年貢方物慶歷四年六年七年貢方物皇祐元年貢方物至和元年貢方物嘉祐三年四年貢方物治平元年貢方物

董戩熙寧三年十年貢方物元豐二年貢方物  
層檀熙寧四年貢方物

勿巡大中祥符四年貢方物熙寧五年貢方物

賓同隴至道二年貢方物

甘州天聖三年貢方物

西州皇祐二年來朝

大食施婆離慈熙寧三年貢方物

大食俞盧和地熙寧六年貢方物

西天大食國熙寧六年來朝

大理國熙寧九年貢馬

# 宋朝事實卷十三

## 儀注三

凡勘箭皆左右金吾仗司主之。箭筈長二尺五寸。鵬羽金鰲筈。輸石鏃。闊二寸。方斜形如匕。二箭合鏃。有擊柄。爲雄雌體。箭藏內中。一爲辟仗箭。藏本司。皆韜以絳羅銷金囊。每車駕至門。閣門使持鵠箭贊云。勘箭官來前。勘箭官稱喏。跪受箭。以左右箭相合。奏云。內外箭勘同。閣門使承制云。準勅行勘。勘箭官稱軍將門仗官前來。軍將門仗官二十八人。齊聲喏。勘箭官言呈箭。又聲喏。勘箭官云。某年月日。皇帝宿齋于某殿。某日。具天仗迎鑾駕出入某門。詣某所行禮。內出雄鵠箭一。外進辟仗箭一。準敕符。左右金吾仗行勘。勘箭官稱合不合。和箭門仗官皆稱合。如此再問對。又問同不同。和箭門仗皆稱同。如此再問對。勘箭官乃伏奏云。左右金吾列駕仗。勾盡都知。具官臣姓名。對御勘同。其雄鵠箭。謹奉閣門使。進入諸司。準式勘箭官卽起居。三呼萬歲。開門進輅。凡宣德門出。左仗主之。景靈宮入。右仗主之。太廟入。左仗主之。南薰門入。則勘出則否。

(案)宋史禮志熙寧四年。參知政事王珪言。南郊乘輿。所過必勘箭。然後出入。此師行之法。不可施于郊祀。禮院亦言。于是凡車駕出入門。皆罷之。六年。以詳定所請。又罷太廟及宣德。朱雀。南薰諸門勘契。蓋自熙寧以後罷勘。

箭。故史志不詳其儀。而東都事略及長編諸書亦不復載。

許立家廟。已賜門戟者。仍給官地修建。

〔案〕宋史禮志慶歷元年南郊赦書。中外文武官。並許依舊式立家廟。宋庠請下兩制禮官詳定。官正一品。平章事以上。立四廟。樞密使以下。節度使。東宮少保以上。皆

立三廟。餘官祭于寢。凡立廟。聽于京師。或所居州縣。大觀間。議禮局言。有私第者。立廟于門內之左。如狹隘。聽于私第側。力所不及。仍許隨宜。詔製祭器。給賜之。未嘗給以官地。修建也。自紹興十一年。詔臨安守臣爲秦檜營建家廟。後章淵吳益楊存中吳璘虞允文韓世忠史浩等。並請建家廟。賜以祭器。參用大

觀紹興故事。此書所載與宋史互異。

册公主儀制。太常禮院上封册。堯國公主儀注。前一日。有司設册使等幕次。于內東門外。設內命婦次。

于公主受册印本位門之外。又設公主受册印本位。于庭階下。北向。又設册使位。于內東門。副使及內給事。于其南。差退。竝東向。北上。又設册印案。于册使之前。南向。又設內給事位。于册使北。南向。其日。自文德殿。奉册印。將至內東門。內給事詣本位。請公主服首飾。褕翟。册印至內東門外。褥位。置訖。捧册官少退。內臣引內命婦。俱入就位。禮直官引册使。副使等。俱就東向位。立定。內給事進。就南向位。通事舍人。博士。引册使。就內給事前。東向。稱册使某。副使某。奉制。授公主册印。退。復位。內給事入。詣所設受册印本位。公主前言訖。退。內給事進。詣册使前。面西。册使前跪。以册印授。內給事亦跪。以授。內謁者及主。當內臣等持册印入內東門。內給事從本位庭中。內給事贊。公主降詣庭中。北向位。立定。跪取册。興。立于公主之右。少前。

西向內給事。立于公主之左。少前。東向。又內給事稱有制。內給事贊。公主再拜。訖。內給事捧冊。跪授公主。公主受。以授內給事。內給事捧印授公主。如捧冊之儀。內給事贊。公主再拜。前引。公主升位。以次內臣引內命婦。賀內給事贊。言禮畢。內命婦退。遂引公主謝皇帝皇后。一用內中之儀。

〔案〕宋史禮志載公主受封儀。謂自此遂爲定制。

太常禮院言。古者結婚。始用行人告以夫家采擇之意。謂之納采。問女之名。歸卜夫廟。卜而獲吉。以告女家。謂之問名。納吉。今選尙一出朝廷。不待納采。又公主封爵已行。誕告不待問名而卜之。若納吉成。則既有進財。請期。則有司擇日。宜稍依五禮之名。存其物數。俾知古者婚姻之事至重。而夫婦之際有嚴如此。則亦不忘古禮之義也。欲自公主出降日。令李瑋家主婚之人。具合用鴈帛玉馬等物。陳于內東門外。以授內謁者。進入內中。付掌事者受之。其馬卽不入。從之。

〔案〕此條脫去李瑋尙克國公主年月。

太平興國五年。令有司詳定打毬儀。三月。會鞠于大明殿。用其儀。有司于毬場東西樹雙木爲毬門。高丈餘。首刻金龍。下施石蓮花座。加以綵繪。左右分朋主之。以承旨二人守門。內臣十二人。

〔案〕內臣十二人。宋史作衛士二人。與此互異。

持小紅旂。唱籌。御龍官衣錦繡服。持哥舒棒。以周衛毬場。殿階下東西設日月旂。教坊設龜茲部鼓樂于兩廂。鼓各以五。又于兩毬門旂下。別各設五門。豫定分朋狀。取裁親王近臣。節度觀察防禦團練使。刺史錢俶。劉繼元。駙馬都尉諸司使副。供奉官殿直。悉預。其兩朋官。皇親及節度使以下。服異色繡衣。左朋黃。

欄。右朋紫欄。打毬供奉官。左朋服紫繡。右朋服緋繡。烏皮鞞冠。以花插腳。折上巾。天殿院擇馬之馴習者。并供鞞勒。上自禁中乘馬出。教坊大合涼州曲。諸司使以下前導。從臣奉迎。上降馬。御殿羣臣謝宣召。以次上馬。馬皆結尾分朋。乘馬自兩廂入。序立于西廂。上乘馬當庭西南駐。內侍發金合。出朱漆毬。擲于御前。通事舍人奏云。御朋打東門。上遂擊毬。教坊作樂。奏鼓。毬既度。颺旂。叩鉦。止鼓。上迴馬。從臣奉觴。上壽。貢物以賀。賜以酒。卽列拜。飲畢。上馬上再擊毬。命諸王大臣。馳馬爭擊。旂下搥鼓。將及門。遂廂急鼓。毬度。殺鼓三通。設繡旂二十四于毬門兩旁。又設虛架于殿東西階下。每朋得籌。卽取旂一立架上。以記之。上得籌。樂少止。從官呼萬歲。羣臣得籌。卽唱好。得籌者下馬稱謝。凡三籌畢。乃御殿。召從臣飲。又有步擊。及跨驢騾擊者。時令供奉分朋戲于御前。以爲樂。後以打毬驢騾。務名不經。改爲擊鞠院。軍中之戲也。

英宗葬永厚陵。英宗梓宮至永厚陵。館于席屋。從韓公下視宮。有正殿。置龍輜。後置御座。影殿。置御容。東幄臥神帛。後置御衣數事。齋殿旁。皆守陵宮人所居。其東有浣濯院。有南廚。廚南陵使廨舍。殿西副使廨舍。都知石全育爲陵使。

〔原註〕次道曰。陵使三年而罷。其後惟置副使及都監。

靈駕至。儀仗轉趣園西殿中。儀仗前導。御容大升輿。御

龍輜。御前殿車輅。各就幕屋。方相儀椁。漆梓宮等。置于塋外。各有方位。司天監處之。兵士各執儀仗。分屯羣縣。偃師。承安。命使臣董之。陵北有枯河。河北原合抱三陵。在青龍山下。其西白虎澗。青龍山西。卽太室也。少室西。俗謂之冠子山。陵前闕角。謂之鵠臺門。側臺曰乳臺。陵臺三層。高五十三尺。上宮方百五十步。

卷四重。共高八尺。厭木者二重。石椁高一丈。其鑿長一丈二尺。深闊七尺。蓋條石各長一丈。闊二尺。十四板。皇堂方三丈。深二丈三尺。麓巷長八十三尺。深闊一丈八尺。自平地至深六十三尺。隧道長四百七十尺。石人物六十事。韓公曰。力士所得直。及賜予。人不過七緡而已。癸酉。黎明。設遣奠于幄殿。有牲牢祝文。餘皆如朝臨禮。昌王

〔案〕宋史神宗封  
皇弟顥爲昌王。

及五使皆吉服。金帶。導龍輶。降隧道。抵木階。梓宮升石椁西首。御夷

牀。下不及地尺而止。巳時一刻。乃下。置珠網花結于上。布方木。及蓋條石。及設御座于蓋下。前置時果。及五十味食。別置五星十二辰。及祖思祖明尊位于四壁。又設衣冠。劍佩。筆硯。弧矢。甲冑。凡平生玩好之物。又設繒帛。緡錢。然後設册寶。乃然漆燈。閉柏門。置道遙于麓巷。闔石門。缺其闕之中央。留人于內。搯搆畢。匍匐而出。鎖其門。投鑰于內。司徒復土九錡。立石柱于中央。縈以鐵索。乃以都護排防。累石以塞門。實隧以土。五使乃易凶服。設掩皇堂祭于隧外。哭。又于陵哭。人易吉服。黑帶。俟浴虞主畢。奏請降輿。升輅。卽下宮。又奏進發。五使前步。導至下宮。奏降輅。升輿。設第一虞哭。

〔原註〕仁宗之虞不哭。次道曰。唐室請陵。但置香藥。不設食。爲臭腐故也。

乙酉。未明。百官

序立集英殿下。上自東南來。登殿。哭奠。拜。降就幄。宗正卿告遷酌獻畢。虞主乘腰輿。出兩府前。導上步。從至宣德門。乘玉輅。上北面。再拜。辭。是日早。太祝浴粟主于廟門西幄。王禹玉題之。輅及廟門。百官拜迎于門外。虞主御腰輿。人就幄。辰時。百官又立于殿庭。內臣以腰輿迎粟主。置于中庭之褥子。又于褥西北面。



俛伏興稱英宗憲文憲武宣孝皇帝。祔廟內。臣奉主于腰輿。升自阼階。詣真宗室。祔坐于東壁下。少頃。詣本席。褥位。公卿以下。行禮奏樂。如時享之儀。畢。以腰輿奉桑主。埋于席北。百官入慰。乙酉。祔英宗于太廟。太宗詔天下。前後詔敕。並聽于敕書樓。著以籍。受代日。交相付。仍于印紙歷。及南曹歷內批書。

凡公家文書。謂之藁。中書謂之草。樞密院謂之底。三司謂之檢。今祕府有梁朝宣底。卽貞明中。崇政院書也。檢卽州縣通稱焉。

理宗用黃封東板。或以牙作號御槩。

〔案〕此記理宗事。疑非李攸原本。

至和元年。詔中書提點五房公事。雖無出身。亦聽佩魚。舊制。自選人入爲堂後。轉至五房提點。始得佩魚。提點五房。呂惟和。非選人。入授司天監五官正。求佩魚。特許之。

眞宗仁宗兩朝。禁銷金縷金。眞宗大中祥符四年七月。後苑匠爲民造銷金。開封府奏。罪當笞。帝以不足懲誠。刺面配中靖。

仁宗性節儉。不喜華侈。尤惜財用。景祐二年五月九日。謂近臣曰。訪聞市肆。以縷金爲婦人首飾冠子及梳等。潛將貨賣。況先朝已有制條。禁銷金之作。今縷金之用。耗盡奢侈。與銷金無異。須議行斷絕。宰臣對以法嚴則令行。乃下詔曰。幣器之興。金縷爲重。理財藝貢。邦用賴焉。洪惟先朝。深鑒治本。特嚴塗鑠之禁。以杜奢僭之萌。而宵人末工。放利矜巧。深冒舊防。糜壞至寶。崇華首服。交相貿鬻。陰長奇袤。官司因循。曾

未呵謫宜申布于前令俾大革其非心倘或弗悛罔有攸赦敦風遠罪當稱朕懷檢會大中祥符元年天禧二年二月編敕除大禮法物上從中禁下暨庶邦但係衣服裝著之類土木翫好之物並不得以金爲飾如違並科違制之罪其臣僚之家罪在家長皇親宮宅只坐勾當使臣并駙馬都尉其充業匠人不得輒便造作罪當行處斬如官司并隣人不覺察造作者亦當勘罪重斷仍許人告得實支賞錢一百貫文至慶歷二年又以銷金等物未盡禁止又下詔曰朕欽遵聖猷精求政治務非躬而圖儉庶率己以先民眷乃良金時爲上幣何茲流俗未穆醇風侈麗相夸蠹弊滋廣銷燕珍寶變尙服裝增效魚龍之文頗奸輦輦之制寢踰法度遂益僭差頃在先朝累頒深詔爰重禁防之格乃開購告之塗肆朕纂承亦嘗申飭如聞近歲違冒猶多俾條舉于舊章冀懋成于敦化必驅衆正宜自近初上從宮掖之嚴下暨臣民之伍均行屏絕用一等倫除大禮各有舊用依前行用內庭自中宮以下並不得銷金貼金縷金間金蹙金解金陷金明金泥金榜金背金闌金蒙金等但係裝著衣服並不得以金爲飾其外廷臣庶之家不以有官無官封邑並皆禁斷宜令宰司申明前後條貫指揮皇祐三年殿中侍御史張澤行奏曰臣聞眞宗朝已有衣明金銷金一禁之後無有犯者其故何也蓋聞先自宮中禁斷然後知禁令必行無敢犯之者如聞京師近年頗不禁絕此壞亂先帝舊法又違陛下崇儉崇孝之德夫先帝發一號出一令豈徒然哉蓋欲後世師其儉也況陛下動作皆法先訓遂致治平而世俗敢此冒禁者風俗侈靡使然也惟陛下可以

裁之抑之。無知之民。從其所好。如允臣所言。亦乞先自宮中禁斷。仍檢會舊敕。如有犯者。並從違制定斷。其工匠人。仍乞處斬。所貴知悉。上語輔臣。令舉行前後詔書。嚴行禁止。自是銷金之弊。遂止。

禁止奢僭制度。仁宗景祐三年。詔曰。儉守則固。約失則鮮。典籍之格訓也。貴不逼下。賤不擬上。臣庶之定分也。如聞輦轂之間。士民之衆。罔遵矩度。爭尚僭奢。服翫纖華。務極珠金之飾。室居宏麗。交窮土木之工。倘懲誠之弗嚴。恐因循而滋甚。況歷代之制。甲令備存。宜命攸司。參爲令式。庶幾成俗。靡蹈非彝。其令兩制。與太常禮院。同詳定制。度以聞。及羣臣議上。因詔天下士庶之家。凡屋宇。非邸店樓閣。臨街市之處。毋得爲四鋪。作及鬪八。非品官。毋得起門屋。非宮室寺觀。毋得彩繪棟宇。及間朱漆梁柱。牕牖。雕鏤柱礎。凡器用。毋得表裏用朱漆金漆。下毋得襯朱。非三品以上官。及宗室戚里之家。毋得用稜器。其用銀稜者。毋得鍍金。玳瑁酒食之器。非宮禁。毋得用純金之器。若經賜者。聽用之。凡命婦。許以金爲首飾。及爲小兒鈴鐺用。餘以爲釵簪釧纏珥環者。聽之。仍毋得爲牙魚飛魚。奇巧飛動。若龍形者。其用銀。仍毋得鍍金。非命婦之家。毋得以眞珠裝綴首飾衣服。及項珠纓珞耳墜頭簪。抹子之類。凡帳幔。複壁。承塵。柱衣。額道。架帕。簾牀裙。毋得用純錦。徧繡。宗室戚里。茶擔子。并食合。毋得以緋紅蓋覆。豪貴之族。所乘坐車子。毋得用朱漆。及五彩裝繪。若有黑漆。而間以五彩者。聽之。民間。毋得乘擔子。及以銀骨鑲水罐子。引喝隨行。其用兜子。所昇。毋得過二人。非四品以上官。毋得服金帶。舊經賜者。聽之。非五品以上。毋得乘鬧裝銀鞍。其乘

金塗銀裝條子促結鞍轡。自文武升朝官及內職禁軍指揮使諸班押廂軍都虞候防團副使以上聽之。仍無得以藍黃爲條。白皮爲鞵轡。民庶只許以氈皮絕紬爲鞵。京官爲通判以上職任者許權依升朝官例。違者物主工匠並以違制論。工匠仍刺配他州。有陳告者賞錢五萬。其過百日而不變毀者坐之。宜令宣徽院御史臺閣門左右金吾衛司開封府覺察以聞。

禁止鋪翠銷金等服飾。太上皇帝紹興二十七年。

〔原註〕  
闕月

手詔。朕惟崇尚儉素。實帝王之先務。祖宗之

盛德。比年以來。中外服飾過爲侈靡。雖累行禁止。終未盡革。朕躬行敦樸。以先天下。近外國所貢翠羽。六百餘隻。可令焚之通衢。以視百姓行法。當自近始。自今後宮中首飾衣服。並不許鋪翠銷金。如犯此禁。重置于法。仰幹辦內東門司官常切覺察。不得有違。若失覺察。以違制論。其中外士庶。令有司嚴立禁法。貴近之家。尤宜遵守。如有違犯。必無容貸。故茲詔諭。各宜知悉。